

ምግብ፡ እጅማሪ አንፋር መጽልስ ምስል ሽዑብ

አንፋር መጽልስ አቅሊም ምግብ፡ ቀራራት ወፊናታት ናይሉ ዲብ ዮም 4 ማርች ለገብኦ 23ይ እጅማሪ ርቱብ መጽልስ እግል ሽዑብ ተውድሖ ሀበው።

ዲብ ዮም 6 ኣብሪል ዲብ 16 ምዴርየት እተ ወደው እጅማሪ፡ ለትቀደመ አፍካር ወናይሉ መጽእ ወክድ በራምጽ ሐቅ ሸርሐው፡ መጽልስ ምስል ሽዑብ ወጅሃት ተንፊዝየት እንዲ አማሕበረ ፍዓልየት በራምጽ እግል ልታብሉ፡ ለልትቀደም ቀድያት እብ ተአስትህል እንዲ ፈሀመ በሊስ እግል ልርከብ ዲብ ወደዮ ጅህድ ሽዑብ ከም ዲመ መሻረኩቱ እግል ለአዚድ አትፋቀደው።

መሻርኩት እብ ጀሀቶም፡ ለህድግ- ሄራርሰ ልሰርገል ለህለ

በራምጽ ወመሻረኩት ሽዑብ እግል ለፍሀም ከም አቅደረዮም እንዲ ሐበረው፡ እጅማሪ ሽዑብ ወአንፋር መጽልስ ዲብ መታብዑት ወፍዓልየት ልትኤተን በራምጽ ወበሊስ ወቅት ለጠልቡ ሰአላት ምህም ሰበት ቱ፡ አተላላይ እግል ለህሌ እግሉ ትፋኑው።

እት ደንገበ ህዩ፡ ጀራይም ወወገብ እግል ልንቀሰ ዝያድ እግል ልትከደም፡ ኩብቱ ለአለቡ ቀለ መራቀብት እግል ትግባእ እቱ፡ ከራብ ዕጩይ እግል ልትከራዕ ለሰዓ በዲል ጣቀት እት ክሉ እግል ልብዳሕ፡ ለኢትብን ቡንቶታት እግል ልትደባእ፡ ወፍንጌ ሰብ አብያት



ወሰብ ክራይ ለህለ ኢመፋህማት ሐል እግል ልግባእ እግሉ ለልብል ረአይ ትቀደመ።

መጽልስ አቅሊም ምግብ እት 23ይ ርቱብ እጅማሪም፡ ለኣለፊዩ



ፊናታት፡ መሻክል ሓድር ሽዑብ ለባልሕ በራምጽ አውለውየት እግል ልትሀየብ፡ በቃዐት ተዐሊም እግል ትሰኔ፡ ዕላቀት ሙደርሊን ወዋልዲን እግል ትደቀብ፡

አትሳናይ አግቡይ ቅጥራን እግል ለአተላላ፡ መአሰሳት ከደማት እጅማሪየት እግል ልሰኔ ለለአትሐዜ መዋድ ሐል እግል ልግባእ እግሉ ለልብል ብእቱ።

አስመራ፡ እድንያይት አምዕል ዓፍየት ትዘክረት



ዮም 7 ኣብሪል እድንያይት አምዕል ዓፍየት “አስትምቡረት ዑፊት እግል ሙስተቅበል ባርህ” ሐንቲሉ ትብል ሰቅራት እብ ደረጀት ወጠን ዲብ መዲነት አስመራ እብ ለትፈናተ በራምጽ ትፈቀደት።

እት ውዛረእ መስኢሊን ወካይል ሙዝማት ምጽልስ ቅራን ለብእቶም ለሐድረወ መናሰበት፡ እት ውዛረት ዓፍየት ናይ ወክዱ ሙዲር ዓም ዓፍየት ሽዑብ ዶ/ር ዓንዲብርሃን ተሰፋጽዮን፡ ፊቃዶ እድንያይት አምዕል ዓፍየት “ዓፍየት እግል ክሉ እብ ክሉ” እግል አክዶት ገለድ ለልትሐደሰ ዲብ መናሰበት ክምተ ሐበረ።

እት ኤረትርዮ ገብእ ለህለ ጅህድ፡ መታብዑት ቀደም ሕርስ 98%፡ ዐደድ ናይሉ ዲብ መአሳሳት ዓፍየት ለልትፈረጀ አንሳት እብ ዝያድ 80% ፍድኢት ህዩ 98% ባጽሕ ክም ህለ እንዲ ሐበረ ሞት እማት ወአጀኒት ክም ነቅሰት ሸርሐ።

ወኪል መዝመት ዓፍየት እት ኤረትርዮ ዶ/ር ኖንሶ ኢጂዮፎር እብ ጅህቱ፡ መጽል ዓፍየት ኤረትርዮ ምዋጥኒን እግል



ጠወርት ለልትሀየብ ክዳማት እግል ልትወቀል እብ ሕኩመት ወሰብ-ሸርኩተ ገብእ ለህለ ጅህድ እንዲ ሐመደ እትሊ ለልትናይት ሸቁል ሀለዮቱ ሐበን ክም ልትሰምዖ ሐበረ።

እድንያይ ተቅሪር ክመ ለሐብር፡ ክል ሰነት ምስል ዕምሰን እበ ልትጸበጥ 300 አልፍ እማት ክም መይተ፡ ዝያድ 2.3 ሚልዮን እጃኒት እት 1ይ ወርሕ ሰማያቶም ክም መይቶ፡ 1.9

ዕልቅ ህዩ ኢልትወለዶ ክምስል መይቶ ወደሐ።

እት ኤረትርዮ ዝያድ 60% ምን ሽዑብ 5 ኪሎ-ሚትር ለኢረይም ክዳማት ዓፍየት ረክብ ክም ህለ ወሳይቅ ውዛረት ዓፍየት ወድሐ።

እድንያይት አምዕል ዓፍየት 2025 እብ ደረጀት ዐለም እግል 77 ኢነት ወእብ ደረጀት ኤረትርዮ ህዩ እግል 29ይት ኢነት ትፈቀድ ሀሌት።

አቅርዶት ወሰንይቲ፡ መሓደራት ምስክነ ዐቦት ገሮብ ወዕቅል ተሀየብ

ዲብ አቅርዶት ወሰንይቲ፡ ፈሀም ሙጽተማዕ ዲብ ምስክነ ዐቦት ገሮብ ወዕቅል እግል ለዚድ መሓደራት ተሀየብ።

እት ምዴርየት አቅርዶት፡ አረይ ምስክነ ዐቦት ገሮብ ወዕቅል እንዲ ፈረዝክ ዲብ መሕበር እግል ልትከምከም ወለወጅሎም መርዒት እግል ልርከቦ አርድየት እግል ትጥፋሕ እሎም ዲብ ገብእ ለህለ ጸገም ዶር ማዕየ እግል ለዚድ ሊክ ትቀደመት።

ዲብ ዮም 2 ኣብሪል ዲብ ገብኦት ህድግ፡ ርኢስ ፈርዕ መሕበር ምስክ-ናም ገሮብ ወዕቅል አቅሊም ጋሽ-በርክ መምህር ተክለዝጊ ተክለማርያም፡ ፈሀም ድንገር እንዲ ትሸክሰ ሰዳይት ወመርዒት እግል ልርከቦ ለለአትሐዜ ሸእ ፈሃዐት ክምቱ እንዲ ሐበረ፡ ዲብ 16 ምዴርየት አትፋቀደት ገብእ ክም ህለ ሸርሐ።

እት አቅሊም ጋሽ-በርክ አስክ እለ 1,184 ምስክነ ዐቦት ገሮብ ወዕቅል ለም ሰጅላም ክም ህለው ተቃሪር ማሕበር ለአፍህም።

እብ ጀሀት ብዕደት ዲብ ምዴርየት ሰንይቲ ፈሀም ሙጽተማዕ ዲብ ምስክነ ዐቦት ገሮብ ወዕቅል እግል ልዕቤ ለአመመት መሓደረት፡ ዲብ ዮም 2 ኣብሪል እት መዲነት ሰንይቲ ትሀየብ።

መስኢሉት መክተብ መሕበር ዲብ ምዴርየት አሰይደ ልጅዩ ዕቕቡ እተ አስምዐተ ከሊመት፡ ክለን ጅሃት ሙጽተማዕ ፈሃዐተን እንዲ ዓበዩ መራዐየት ወሰዳይት እግል ሊደዩ እግሎም አትፋቀደት።

እሊ ክእነ ዲብ እንቱ፡ ዲብ መድረሰት መአንብታይት ምዴርየት ዐዲ-ኳለ እግል ደርሶ ናይ ዐቅል ወዐቦት ገሮብ ምስክ-ናም፡ ሰዳይት መዋድ ናይ አትፋቀደት በራምጽ ገብእ እግሎም።

ለመባደረት ናይ ምስክነ ዐቦት ገሮብ ወዕቅል ለም መዋጥኒን ርሐም እግል ልጠውሮ ወዲብ ሙጽተማዕ መሻርኩት እግል ልግብኦ ለአመመት ክምተ ትሻርሐ።

ዓለበርዕድ፡ እግል ሐረሰቶት ተእሂል ልትሀየብ

እት ምዴርየት ዓለበርዕድ፡ ምን 8 እዳረት ደዋይሕ እግል ትወክለው 35 ሐረሰታይ ናይሉ ለአደርሶ ተእሂል ቀፎ መደወር ዲብ ዮም 2 ወ3 ኣብሪል ተሀየብ።

እት ፈርዕ መሕበር ወጠን አዋልድ አንሳት ኤረትርዮ አቅሊም ዐንሰበ መስኢሉት ከደማት እጅማሪየት ወመሻርዕ አሰይደ ትርኣስ ንርአዮ፡ ለተእሂል መሕበር ወጠን አዋልድ አንሳት ኤረትርዮ አቅሊም ዐንሰበ ምስል ሰብ ሸርኩቱ እንዲ ትዓወን ለክመዩ ክምቱ እንዲ

ሐበረት፡ ፈሀም ሙጽተማዕ ዲብ ኣብሳር እዳረት ንህብ ወመዳላይ ሸክል ሰሙይ ለቡ ቀፎ ወቅዝ ለብ ሙነት እግል ልትአከድ ክምቱ ሸርሐት።

እብ እዳራት ለትሌለው ዲብ ተእሂል ለሻረከው አንፋር፡ እግል ተዋብ ንህብ ምን ውጡይ ላቱ ድዋራት ለመጽአው ወለምህነት ኣምራም ለጸንሐው ዲብ ገብኦ፡ እት ባካቶም ለህለው ሐረሰቶት እግል ለአድርሶ ከም ልትሰአው ሐበረት።

በዐል መቅደረት ተዋብ ንህብ እት ምዴርየት ዓለ በርዕድ አሰይደ ንጉሴ መሓሪ እብ ጀሀቱ፡ አሀምየትሉ ተእሂል እንዲ ዘክረ፡ ሸክል ሰሙይ ለቡ ቀፎ ዲብ በርኩት እተይ መዐር ወአርትዶት መጋድዕ ዕሽል ንህብ ዶር ክም ቡ ኣብርሀ።

ለደርሰው እብ ጀሀቶም፡ ለከሰበው አምር፡ ዲብ ተዋብ ንህብ ለዐለ እግሎም

ፈሀም ለለዓቤ ክምቱ እንዲ ሐበረው፡ ዲብ ድዋርም እግል ህለው ሐረሰቶት እንዲ አድረሰው ዲብ በርኩት እተይ መዐር ለልትሐዜ ዶር ከም ቀድሞ አከደው።



ጀማሂር ሳሕል እት መሳክብ በዲሮም

ዮም 4 ወሬሕ 4 ሰነት 2025 ጽብሕ ምድርቱ ለዐለ። ለዲመ ዲብ ክል ሐል ንታከየ ጀውለት አው ሐውልየት ጀማሂር ሳሕል ክሎም አንፋር ጀማሂር ሳሕል እብ አጥካይ ለልታከወ ዝክርያቶም ለለአትሐድሶ እት ወቀዳሚቶም ላዳግሞ እት መናሰበት ሰበት ተ ዲመ ልታከወ ወልተምነው። ለጀማሂር ምስል ዲብ መሳክብ በዲሮም ለነብር ገቢል ሳሕል እብ ዓመት ወነቅፈ እብ ፍንቱይ ለለአመሕብሮ እት ፍቲት ጀውለት ምን ገብአትቱ ህይ ጽብሕ ምድር ምን እት ምግብ መዲነት አስመረ ለህለ መብክ መክተብ እዳረት አቅሊም ምግብ ላት በለድየት በገሰ አስክ ምድር ምሕርበት ለገብአ።

ጀውለት ዮም ዓመት ምን ሐልፈ ጀውላት ፍንቱት ምንመ አለቤ ክመ ናይ በዲር ምድር እንዴ አተጽበሐክ እንዴ ኢገብእ በገሰነ አክል ሕድ ሳዐት 5 ወ30 ደቂቀት ለወዛረት ድፈዕ የበተተናቱ ጸዕደ ባስ እግል ሸዋሬዕ አስመረ እት ሻግግ ወሳዋር እብክ ሸዋሬዕ አፍባበት። ማይ በለ



ወዐዲ አቤቶ እንዴ ተአልበጠ እብክ ምድር ሰኒ እንዴ ኢጸብሕ ምን አስመረ ሸንክት ቅብለት ሐወጽኑ።

ለምን አስመረ አስክ ነቅፈ እመም ለዐለ ሰፈርነ ህይ ምን ዝክርያት ናይላ ቀደም ሰር ዘበን ዲብ ሳሕል አንፋር ጀማሂር ለዐለው ገዳይም ምናድሊን ሰበት ዐሉ። ጀማሂር ሳሕል ለሐልፈ እቡ ሄራር ንዳል ምን ድግሞም ወያንዲኖም ዲብ ነኦተንሴ ለሰፈር ነፍሰ ለትፈትዩ ክምስል ገብእ ሸክ ይዐለ እግልኑ። መኪነትነ እብ ጸላም ጽርግያ ዲብ

ትትፊተት ወሕነ ዲብ እንዳግም ምን ከበሰ አስክ ዐንሰበ እንዴ አትሮሬነ እብ ልወሊት ገበይ ልብ ትግራይ ምን ንቅረት ውቁል ሮራብ ዲብ ቅርድለ ደብር ትከሬኑ። አሰልፍ ለኪድናህ ዐድ ለዲብ ሰብዒናት ቃእድ ናይላ ዲብ ኤረትርየ ለዐለ ጄሽ አቶብየ ለዐለ ጀነራል ተሾሚ እርገቱ እብ ምናድሊን ጀብህት ተሕሪር ኤረትርየ ለትቀተለ እቱ ቢንቶ ባክለ ደዕሮተት ዐባይ ክምስል በጽሐነ ዲብለ ባክ ለዐለ ድን ሀብረንቃቃ መርባትለ ትቀተለ ጀነራል አቶብየ ዲብ ረአስ ሳጼሕ ሸዐብ እንዴ አፍገረው ዲብ ረአስ ሰኮን ሀብረንቃቃ ለጀረ ጀራይም እስትዕማር ልደገም ሰበት ዐለ ክሉ እለ ሓድሰት እለ ለፈቅድ ለዲብ እለ ባኮት እለጀረ ጀራይም እስትዕማር እግል ልትካየል እለ ላገም ቱ።

ምን ታኪ ደብር ዲብ ጋድም ክምስል ትከሬነ አውቶቡሰነ ክም ምራደ እግል ትትፊተት አስተዳት። ለናይ ዘበን ንዳል ሐልየት እብ ዳምቅ ሰፒክር ሐነ ዲብ ወዴ። ነቅፈ ወሳሕል ለልብል ሐልየት ዘበን እስትዕማር

ገራጅ ሕኩመት ከረን እንዴ ንሰት ናቅሰተ እንዴ አትመመት እብ አሰረ ጠበሽ ቴለኑ። ሐቆ ዕርፍ ወፍጡር ዲብ ከረን ህይ አዜመ ክሉ አዳም ክምስል ትከማከመ ሰፈርነ አስክ ቅብለት አተላሌኑ።

ምን መዲነት ከረን ጀህት ቅብለት ለህለ ድን ያነ ክምስል በጽሐነ አንፋር ጀማሂር ሐቱ ዶል እንዴ ቤለው መስኡል መሕበር ጀማሂር ሳሕል አሰይድ ሀብተ ገብረማርያም ወረቀት ምን ጄቡ እንዴ አፍገረ። “ሐቱ ዶል እዝን ንክረ” ቤለ ወእግለ እብ ምናድል ሙሴ ምስግና ታሪክ ጀራይም አባይ እት ረአስ ሸዐብ ያነ ለትሸፊሕ እብ እዴ ለትከተበት ወረቀት ዝያደት እግለ ሐዳይስ ዌርሰት ውላድ ጀማሂር ቀርአየ። ድን ያነ ዲብ ሰነት 1970 እብ ንዛም ሀይለሰላሳ ለዐቤት ጀሪመት ለጀሬት እቱ ድንቱ። ሐድ 750 ላጽሕ ሸዐብ ያነ ህይ እብ ሰኮኪን። ጥለግ ወሰሩመ እብ ሐያቱ ዲብ እንቱ ዲብ ገሀር እሳት ለትቀመደ እቱ መክሩህ ወክድ ለተአትፋቅድ ወጀራይም መስተዕምረትእት ረአስ ሸዐብክ ለትሸፊሕ ወረቀት ክምስል ትቀረአት አዜመ ለሰፈር አተላላ። አይወ ሰፈር አስክ ምድር ምሕርበት ሳሕል። ለደርብ ሕድ ለዐለ ሐልየት ሰውረት ሐነን ዲብ ልብል ወአዳም ድማን ወድገለብ ዲብ ልትዋለብ እግለ እብ ጋምል ወሻፍቅ ድበዕ ማንገሰ ለትገልበበ ጀራዲን አርቶለ ድማን እንዴ አትሌነ ጸባብ ሐለፍኑ።

ገበይ ከረን አፍባበት ማሸከለ ዮም ዓመት ክምስል በዲረ ኢጸነሐተነ። እብ ሸሪክት ብክ ዐዲህሉ እብ ሕሩይ ጨበል እንዴ ደግደገት ወእንዴ ፊይሐት መኪነትነ ምን አስቡሕ እት ትትቀራቀብ ወዲብ ተአሳልል ለትከሬተ ገበይ ቅዋራን አስመረ ከረን ለሐሰት እት እንተ ጸንሐተነ። እግለ ወክድ ንዳል ለለአፋቅድ ሐልየት ሰውረት እት ነኦተሴ ወቀዳሚትነ ዲብ ንትፋቅድ ህይ ለሰፈር ሰኒ ወአማን ዐጅቤነ ወበሰጤኑ። ለጋምል ድበዕ ማንገሰ ድዋራት ሐመልማሎ ድማን እንዴ አትሌነ እግለ ዋውርት ኩልየት ሐርስ ሐመልማሎ እት ነኦትቃምት። ድን ሐመልማሎ እብ ምግቡ እንዴ ሸገግናህ ህይ። ሕሊል ዐንሰበ እንዴ ተዐዲነ ለዲብ ወክድ ከርዶን ነቅፈ ወሐርመ ኢያም እንሰሓብ እስትራተጂ ታሪክ ለትሸቀ እቱ ወዐውል ቃሊ ለደፈዐ እቱ ባኮት ገንፈሎም በጽሐኑ። መዲነት ሐመልማሎ ምን ሐቆ ሕርየት ለተአሰሰ መዳይን አው ፍሬ ሕርየት ተ። ክሉ ለድዋራት እት ነዐፊ መክራተ ምድር ምስለ ቀደም ሰኒን ብዙሕ ጀላብ ሕርየት ወእስትቅላል ገብእ እቱ ለዐለ ሐርብ ተሕሪር ዝያደት ክሉ ልብ እግል ንክሬ እሉ ቀደርኑ። ለታሪክ ዎሮ ከእግለ እት ባኩ ግሱይ ለዐለ ሸርሐ ዐለ። እብ ሐልፈ ንዳል ተሕሪር ዲብ ነኦትዋይን ለሐዲስ ሐቆ ሕርየት ለሐድረ ድን ቁሽ እንዴ ሐለፍነ እብ ስጋደት መስሐሊት አተንከብኑ። ዲብ ሐርመት መስሐሊት ሸቁይ ለህለ ትምሳል



ናይላ ዲብ ወክድ መደውሻሽ ናደው እዝ ታሪክ ለሰጀለው ምሕርበት ወፍርሰነት ለከሰስ ክቱብ ለብእቱ ትምሳል እንዴ ሐለፍነ አስክ ግዝግዝ አድርፊኑ።

እለ ባኮት እለ ዲብ መደት መደውሻሽ ናደው እዝ ታሪክ ዐቢ ሰጽል እቱቱ። ዲብ እለ ለወድቀው ሹህደ ተሕሪር ብዝሓም ምንማቶም ለዐቢ ቃእድ ውህር ነቅፈ ልትበህል ለዐለ ምናድል ዐሊ አብርሂምመ እትሊ ባኮት እለ እስትሸሁድ ቱ። ሸዐብ ዳሕየት ግዝግዝ ሸዐብ ዕጹም ወኬድማይቱ። እግለ ግርሁ ልግበእ ወአድብሩ ክሉ እብ አክረት ወአሸረዐት እንዴ ሳለለዩ። ደለ ቀዋረት ቅዋረት ዲብ መግል ሐርስ ክምስል ትውዕል ለወዴ ገቢልቱ። አዜመ ምንገብእ እግል ሐን ከረም መዳሊቱ ወዴ ህለ። ሐረሰቶት ግዝግዝ ምን አዜሆም ሰሮም አብዕረቶም እንዴ ቃረነው ነዐ ሆነ ዲብ ልብሎ ውዲብ ጸገኦ ወሰሮምመ ግርሆም ዲብ ገዐ ወምን እመን ዲብ ለአነጉ ክምስል ረኤናሆም ሸዐብ ግዝግዝ እት ወራት ሐርስ ለህሊት እሉ ተጅርበት ወመዕጸም ሰኒ ዐጅቤኑ። እለ ውብዕድ ዲብ ነዐፊ ወእብ መክራተ ምድር ዲብ ንትዐጀብ ህይ ለሰፈር ዝያደት ፈቱናህ። ድማን ወድገለብ ዲብ ንትዋለብ እምበል ዲብ ድዋራት ግዝግዝ ወቅጋይ ዲብ አርድ ብዕድ ብዙሕ ለኢልተኤ ገንዳታት ዕጩይ



ሕመር እት ነዐፊ ለሐቆ ወእንዴ ኢልትአመረነ ዲብ ሐቆ ሕርየት እንዴ ሐድረ ምን ወክድ ዲብ ወክድ ዲብ ለዐቢ ወልትዐመር ገይሰ ለህለ ድን ግዝግዝ ክምስል በጽሐነ ላት ዲብ ሐቱ መዲነት ለአቱነ መስለ እትኑ። ምን ነኦይሽ ዌርሰት ህይ ዎሮ “እላተ አፍባበት?” ክምስል ቤሉ “ላለ አፍባበት ልሰዕ ህሌት አስክ

አፍባበት እበጽሕ ህይ ግረ ሕርየት ለበቅለ መዳይን ህለ። ከረ ቅላመት ወፈልከት ለልትበህል” ዲብ እምብል በለሰነ እሎም።

ለገበይ ምን ቅያስ ወለዐል ምስል ገበይ ቅዋራት ለተትሐሴ ዐለት። ዐረብየትነ እብ ሐቱ ማርሻት ዲብ ተአለምቤ እብክ ህይ ፈለግ ቀጻይር እንዴ ትከሬነ አስክ ቅላመት ዲብ ነሐልፍ መደት ሐቱ ዲብ እለ ገበይ እለ ለሳደፈተኒ ፈቀድቱ። አነ ወዕያልዩ ምን አፍባበት ክምስል ትበገሰነ። ለበዐለ አውቶቡሰ ሕግሰ ፈለግ ቀጻይር ክምስል በጽሐኑ ክልኩም ትከረው ቤሊን ወእብ ትቃርብ እንዴ ሐለፍነ ጸንሐናህ። ህቱ ምን ቅያስ ወለዐል ዲብ ልትቀራቀብ ለዐገበት እብ ከም ሓይል ማይል ፈግረየ። ዮም ሳኪን ኢከም ማሌ መኪነትነ ዲብ ትትፍቱተት እብክ ክምስል ትከሬተ ሰኒ ትፈከርኑ። ገበይ ሐቆ ስ ሰኔት ህይ እግል ክሉ ትሰኔ።

ቅላመት ወፈልከት እንዴ ሐለፍነ አፍባበት አፍባበት አቱኑ። ጀማሂር ሰሮም እብ ሕግት ምን ግንደዕ። ባጽዕ ወፎሮ ለመጽአው ወምን አፍባበት ወናሮ ምስልነ አስክ ነቅፈ ለለአተላላ። አንፋር ጀማሂር ሰበት ዐለው። ባኮት ሳዐት 12 ለፋይሐት መዲነት አፍባበት ክም አቱኑ። አፍባበት አምዕል ጅምዐት ሰበት ዐለ ክሉ ንኡሽ ወዐቢ ልባሱ ጸዕደ ላብሰ

እፈትርየዐሕዳሽ

ክል አርቡዕ ለትጠ'በዕ ጀሪደት

መዳልያይ፡-
- መሐመድ እድሪስ

ለይአውት ወአርተዖት
* ዘህረ ዐሊ
* ፋጥነ ኢድም

ተለፎን፡ 121797/201820 (258)
ፋክሴ፡127749፡ ዕ.ሰ.ቡ፡ 247

ተውዝዕ ጀሪደት፡
ተለፎን፡163471-07588045

አትአመሮት፡
ተለፎን፡ 125013፡ ዕ.ሰ.ቡ፡ 1284

11^ይ ክፋል

ሓምድ እበ ሰላሳ ለገብአ ጀሃሪሁ ወምን ሰሓቀን ለኢትዮጵያ አትባርህ እግልዬ ወሐር፡ “መዐልም ሌሀ ፊርቶ ሰርሐ ትርጉፍ ህሌክ” ቤሌኒ። ሕገ ረአሰነ ኬን እት እንገደሰ አሰክ ግብላት፡ ለእዳሁ አሰክላ ግራነ ሃይባመ ለዐልነ ጀሀት ቅብላት ትሐብረኒ ዐለት፡ “ምነ ክሉ ክሉ ኢነሐልፍ መናዝልነ እሊ እግሉ ትርጒሕ ቱ” ቤሌኒ ምን ሐዲሰ ተበሰም እት ወዳ።

ጸሓይላ ነፃ ለሀ አሰክ ምምያየ እንዴድረሬት ሐዋናይ እንጮጭሓይ እት ርሽመት ደብር ፋዴ እብ ጀሀት ምውዳቅ ጸሓዩ ሸንክት ጀብሀት ጸርነ ልትርጒሕ ምነ ዐለ። ጸሓይ ወሕነ ክል ምሴት መጥመጦር ቀበሊት አድሕድ ንትሳሰዱ። ህተ እግል ምምያየ ወሕነ እግል ትርጉሃን እት ላሊህ። ህታመ እት ካልእ ከፈፍል ዓለም ተአትባርህ ትገብኝ። ሕነ ላኪን እግል ስያደትነ ወሕሽመትነ ሊኪዶ ለሀንቁ ለዐለው ሕልሞም እግል አፍሸሎት። እት ጽልመት ወበርሀት ዝናርነ እንዴ ሰደድነ መርዓዊነ ዐሸሉ እንዴ ኢለአዘፍፍ ወወሬዛነ እንዴ ኢልትዐሸል፡ አሰክ አግባብ ዜምተት እት ንትጋብብ ተአትቃምተኝ። ለኮን ሃድእ መሰል ዐለ፡ ለሸብሃት ሕም ትትሰመፅ እቱ የዐለት። ፈጅአተን እበ ሸብሃት ጋሻይ ምንዲ ለሐልፍ እብ ግርመት ጠቢዐት ልግበእ ወስኩንላ ድዋር ሰኒ ፋይግ እት እንቱ፡ “ሐምዴ! ውዳይ ረቢ ሰኒቱ ክምሰል ለእለ ሐዘ ወዴ በዐልዬ። ግንሐ እሊ ሀዳአተ ሞዳይ ወለ ስኩነ” ወቤለ።

አነ ሰብሓን አለህ! ሓምድ መሕሙድ እለ ክምሰል ቤሌኒ፡ ወበዲር ህቱ ምን መባልስ ዐሊ ዳግሙ እግል ለዐለ፡ ምስለ ኖሼ ምን አፍሁ እሰምዑ ለዐልኩ፡ አማን ትሐይሰ ገኖበቼ ትተተት። ደሚርዬ አተግደዐ። ዐሊ ዘረ አክል አሕድ ሐቆ ህዳዩ እብ “አነ አሰተሸህድ” ዐስር ሰቦ ዶል ምንዲ ለአትዐልብ፡ ወአዜ ሓምድ ቀይሕ ሕናመ እሊ እቱ ህሌነ መናዝልናቱ ምንዲ ልብል፡ እት እብል፡ ለእግሉ እንዴ ሰጠርነ እብ ምግቡ አሰክ አንፍ ድፈዕ ወያኔ እት እንገደሁ፡ ርሰዑ ዐልኮ ላኪን ልእግርዬ ኖሰ ለእብ ትሉሉይ ምሴት ምሴት ተአውህሌ እበ ለዐለት ገበይ ኢበዴት ምነ። ክእባቱ አሰክላ አካንላ ምምያይነ እግል እብጸሕ ለቀፈርኩ።

እለ ምሴት እለ ለሐሰብናሁ ሰበት ዐለት እግልነ ምን ጽብሐት ቱ ለነአትየን ለዐልኩ። ሕነ እት ነአቱ ህተን እግል ለክፍ መዳፍዐን ቀናብል ለግመ ወለሐሸየ እቱ ለዐለ። ላመ እብ ሀዳአት ለአትፈክር ለዐለ ድዋር ሐቆ ቅሩብ ወቅት እት ካልእ ሓላት ትቀየረ። ሕኒን- ሕኒን፡ ጅምምም- ጅምምም ለልብል መክሩህ አክራናት እሰልፍ ስምዐቱ እዝን ለትአብዩ ወሐሬ ክሉ ገርብ በረግዕ ለገብእ ምነ እግል ንሰመፅ ትጀበርኩ። ላመ እግል እንቤ ሓላተ ድዋር እት ሐሚር መደት እብ ድዱ ትቀየረት።

ምን ቅብላት ለአትናውራነ ለዐለየ ክራም ወያኔ እግል እብ ክራም ክራም ልፈናትያኩ ምነ ቀናብል ላግም

ምን ሰክክ ዐስር ሐክ፡ ፈጅክት ሐቱ ዶክ

ውዕል ለዐለ መዳፍዐን ወዶሽካታት ወብሬናት እብ ክሻፈት እትየትነ ክምሰል ተአክደት እግሉም ቀበሊት እግል ልግሰዕ ለአሰተብዬ። ግስዐት መዳፍዐን ላኪን ግስዐት ጽጉብ ምን ነብረ የዐለት። ሕሩይነ እግል ልክረመ ወመርዓዊነ ምን ትምኔቱ ወትምኔት ዋልዴን ልፈንትያቱ ለአገሰዓሁ ለዐለ። ኢዘብጠያናመ ምን ገብኤ እብ ረአሰነ እት ልትሞጠፅ አሰክ ምምያይነ እንበጽሕ ሕኒን እት ልብል ህንደገት ልብክ አሰክ እብ ክልኤ እዝንክ ትሰምዐ ደምክ ረፍዕ ወከሬ። ቀደም ክሊነ ሓምድ (አፍዐበት) ወካልአዩ አድም ኪነ እንዴ ምምያይነ በጽሐው ህሌነ እበ ለአሰምዕ እብ ፈርድ ወመጅሞዕ ቃነዮት ጠቢብ ወላብብ ለመሰል እብ ተገግ ተገግ-ተገግ እት ለአሰሉ፡ ለእግሉ ፈቱ ብሬናም ረድ ፍዕል መባሸር ለሀዩበን ዐለው።

ሓምድ (አፍዐበት) አንያቡ ሰላሳ ተን። በሀለት ክል ዋርት በጽሕ አው ሸንጉል ሰላሳ ወክልኤ ኒብ በጽሕ አንያቡ። ሓምድ ላኪን ሰላሳ ኒብ ሌግ ሰበት ዐለየ ቱ። አምዕል ሐቱ ሕሙም ሰበት ዐለ ደወ እግል ልንሰእ መጽኤኒ ወሐር፡ ምስለ እግሉ ማጽእ ለዐለ እንዴ አጸበጠ “ስመፅ መዐልም” ቤሌኒ ከእግል ሰሓቅ አትባርህ እግልዬ። “አሃ ሓምድ ቀይሕ” በለሰኩ እብ ጀሀቼ።

ሓምድ ኖሱ ክምእኒ ምንዲ ቤሌኒቱ እንዴ ኢኮን ለለአሸክክ ጋር ወክፍኤ የዐለ እግሉ አንያቡ።

ሓምድ፡ “አነ መልሀይ አንያብዬ ሰላሳ (30) ተን ከንዶእ ለእበ ገብአያሁ። አዜ ሳይንስ (ዕሉም) ሚ ልብል እግል ኢበለክ እቤ” ቤሌኒ። “አነ ለአምሩ አለብዬ ላኪን ንትሰእል” እቤሉ።

ሓምድ መልሀይ እብ ጠቢዐቱ መትሰሕቃይ ወመትድእላይ ሰበት ቱ። እብ ክእኒ በልሰ እቼ፡ “እንተ መዐልም ስርጉል እንተ ወትትክሰሰ ገሌ አሰመረ በጽሐክ ምንዲ ገብኤ፡ እግል መሐምድ እድሪስ ወወድ መንደር ትሰእል እግልዬ” ቤሌኒ። አናመ ለመልሀይ ሓምድ ሹቁል እብ ለዐለ ጋር እግል እትሰእል እብ ታርህ ሰበት ዐልኩ፡ እንዴ ትሐከርኮ እት ዕያደት ዓለ እግል ክልኦት ወሬሕ እት ሕክምነ ሐቆለ ጸንሐኩ፡ በክት አሰመረ ለእበጽሕ እብ ምንዲ ረከብኩ፡ እግል መሐመድ እድሪስ መሐመድ ትሰእልኩ። መሐመድ እድሪስ እብ ጀሀቱ፡ እሊ ለተሌ በሊሰ ሀቤኒ።

“አሰናይ አርብዐ ኢገብእ አንያብ መልሀይኩ። ሰብ አዋላፍመ ልክሁሉ ህለው፡ እንታዲ ረቢ ሐምድ ሳይንስ ኢትትሰእል ምኑ ወሼክ ኢተአካይር እቱ በሉ” ቤሌኒ። እሊ በሊሰ እሊ አክለ ፈቀድኮ እብ በይንዬመ እብ ሰሓቅ እት አክምምሱ ሐቆ እቅባለቼ እግል ሓምድ በሊሰ ስሕፊ መሐመድ እድሪስ መሐመድ ደገምኮ እግሉ።

“አሰናይ አርብዐ ኢገብእዩ” ቤሌከ ስሕፊ መሐመድ እድሪስ መሐመድ እቤሉ። ከምሰል ምን ልብነ ትሰሐቅነ፡ አነ ወመልሀይ ሓምድ ሰኒድ። ስሐቃም ኢልግብእ ለክፍማም ክራም ወያኔ።

ላሊ ለሀ ዶል እት ረጅሙነ ወዶልመ ሕነ እት እንለክፍ እተን ጽብሕ ምድር አትባርህ። ወምን ጽልመት ሐራሰ አርድ እብ ቅሎፅ ጽብሕ ምድር ፈከ። ላመ እት መማዩትነ ልውዕሎ ዋርድየት አድሐ ጠበሽ ቤለውነ። ህቶም እትነ እትመጽኤ፡ ሕነ አሰክ ድፍዐነ አሰር አድሕድ ክታር ሲር ጸበጥነ። አነ ወዐሊ ዘረ ምስል፡ ሰብ ከላሺን እት ምርሐርነ ወሰብ ብሬን ሓምድ እት መርሐ እሰልፍ ትብገሰው።

ፈጅር ለሀ አምዕል ለሀ ሄልል ሰብተምበር ተ ትውዕል ለዐለት። እት ምውዓልነ ልውቃም ወሰኒ ስሐቃም ወፋርሓም እት ሕነ ወዐልናህ። ክሪት ላሊነ ላኪን ዳልያሙ የዐልነ። ላመ ምስጢረ ዳልያም ለየዐልነ ላሊ፡ ሕነ እብ መናሰበት ሐቱ ሰብተምበር ልወቃም ሐቆለ ወዐልኩ፡ መስኦልየትለ ኮን እግል ላሊ እግል ትሰልመ



ሸሂድ ሓምድ መሕሙድ ዑመር

መጥመጦር መዳሊትነ እግል ድፈዕ፡ ህታመ እግል ማሲ ምድር ትዳሌት።

ማሲ ምድር ክምሰል እዩድነ አሰክለ ምምያይነ በኪተት ሴር ክታርነ ጸበጥነ። ቀደም ሕልፈትነ እት ምቀደም ድፈዕ መስኦል ወሓክም አዳምም ገንሐ ወለሐሶ። ሰበቡ ሐቆ ቀደም ድፈዕ ሐለፍክ እግል ዐስር ክልኤ ሳዐት ምህመትክ ወምህመትለ ምስልክ ሓልፍ ለሀለ መልሀይክ ሐቱ ወለኢተአዋክሰ ተ። እትሊ ሐሲስ ወታብቶት አሕድ ለሐመ ልትዳዌ ወተርፍ፡ ወለ ፈርህ ተአትሓጥሩ ወእግል ኢለአትህምለክ ትራቅቡ።

ክታር ሚርሐትነ እንዴ ኢልትብገሰ መስኦል አጋር ክቡድ አሰልሐት ለዐለ ሌተናል ኮሎኔል ተጨለ እት ቃእድ ሰሪየትነ ዐሊ ዘረ እንዴ መጽኤ፡ “ዐሊ” ቤለ ከአድሀዩ።

ዐሊመ “አይወ” ተጨለ ቤለ ከአሰኩ ረትዐ። “ስመፅ ዐሊ፡ የም ላሊ ምን ድፋዓተን እግል ነአፍግረን። አዜ አሰክ አካን ቅልንቄለት ሐቱ ዶሸክ ምስለ ናደክ ሐይሊ እግል ነአቱ። እንቱምመ ሸሪዋ ብሬን ኢተአውሕዶ” ቤለዩ፡ ከእግሉ ክሸፋ እት ረአሰ ጣግዩቱ

ዐመየ ወለ ምን ህብጡ ኢትትፈንቱ ክሻፈት ምን ፎቃዩ ሸንክት ነደይቱ እድወረ ለዐለ፡ እተን እትልተለህ ገዱ ቀደም ረትዐ እግልነ ሸሂድ ሌተናል ኮሎኔል ተጨለ።

ለምሰል ተጨለ ማጽኤም ለዐለው አንፋር ክቡድ አሰልሐት ህዩ አሰርነ ገበይ ትማጠው።

ህተን እት ምምያየን እንዴ ኢበጽሐ ሕነ እንዴ ሐለፍናህን እብ ዶሸክ እንዴ ተሌነ አርድ እሳት ወዳናሁ እተነ።

ጸሓይ ክምሰል ክልዶል ለትወድየ ህታመ አሰክ ምምያየ ተአድረሬ ምንመ ዐለት፡ እለ ምሴት እለ ላቱ ሕነ ክምሰል እት ረአሰ ለካይናም ለወዴነህ፡ ቀደመ ልሙድ ወቅትነ ሕነ ምምያይነ እት እንበጽሕ፡ ህተ ምን ክሉ ለባክት ንሳል እንጮጭሓየ ሐይብት የዐለት። እግለን ሌግ ኢኮን ለበደርናህን እግል ጸሓይመ ለነሃር ለሀ ላቱ አትህመልናህ

ልብል ለዐለ ህማም መክሩህ አክራናት መዳፍዕ ወዶሽካታት ወሞርታራት ወክላሽናት ወቀናብል እዴ፡ ሕሰ ካልእ ላቱ በተን ኢትሰመዐ እቱ ለባክት። ልብ ለፈትየ ላቱ ከንዶእ እብ ፍንቱይ እት እግሉ ነሀድግ ለህሌነ ሽብሃት ኢትደገመ። ክምሰሁመ ክርንለ ቅብላትነ ወአሰክነ እት ቲሸፍ ልትዳረኮ ለዐለው ዐሳክር ዌረት ወዜምተት አባያምነ ወያኔ። ወለ ምስልነ ለዐለው መስኦሊነ ፍራሰ ማሌ ወዩም፡ “አቤ! እሰመዐክ ህሌኮ። ሀዳናይ በለን እለን እት ምቀደምክ ለሀለዩ። ኮይሰ! ፍህምክ ህሌኮ። ምነ ሞግእ ተጨለ ልክፍ እተን። ቅሎ ኢተአውሕድ እግልዬ። ቅሎ ወስከኒ” ለልብል ሰኣል ወበሊሱ ምስጢሩ ክል ዶል አያይ ወፈታይ ለለአምሩ ኢገብእ ምንዲ ኢገብኤ፡ ካልእ ደሀይ ሐቱ ኢትሰምዐት።

ምነ ለአትፈክር ህዩ እምብል (እንደ አደይ ቅበጽኒ) ወምነ ክብሪ አሰክ እንክር ድማን ለዐለ ድፈዕ ሸንክት ብርጌድ ወዲ ሰሌማን ወራብዓይ በርጌድ ናይ ወዲ ቅጪ ካልእ እንክር የም ቡኑ ጋብእ እት እንቱ እብ መትደጋግ ለአትቃምተነ ቱ ለዐለ ወትመዩ።

ለእት ቅብላትነ ወአሰክነ ለህንቅየ ለዐለየ ዐሳክር አባይ ሞግእ ተጨለ ስምዐየ ምንዲ ገብእ አርድ ወሰመ ጨብብ እተን እብ ፈርሀት። አጋር አጽዋር ክሉ ተንሺኑ ወሀደፋ እሱር ሰበት ዐለ፡ ለኢልምሕክ ሞርታር ወዶሽክ ነድእ እተን እብ ፍዕል ለአምራሁ ምን አምበሱ ገለበ ወጋድም ዛልአንበሰ ወክብት አባሻውል ገሰዐ ምንዲ ገብእ ድራረን ለአትሐድገን ሰበት ዐለ፡ አክለ ተጨለ ትበህላተ መካራተን ልትቀዌ እተን ዐለ።

እለ አማን እለ ለለአክድ ለእት ክል ፈጅር ወምሴ እዴህም ለሀይቦ ለዐለው ዐሳክር ወያኔ ሐቆ ሰላመት ርሐም አከደው፡ “ሚ እግል ቲበሎ ትሐዙ” አክለ ትበህለው “አሰልሐት ተጨለ አርሑነ” ቶም ልብሎ ለዐለው። ለሐደተ ሸንሂቶም።

ላሊ ሰድት እንዴ ሳርሐኩ፡ ያፈራጅ ቤለ ለሞዳይ። ቃእድ ቦጦሎኒነ ሸበቅ፡ ህግያሁ ምሂር ትግረይት ቱ ለልትሃኔ። ሬድዮታት እብ ጀሀትነ ወጀሀተን እብ ትግርኛ ልትራክብ ሰበት ዐለ ህቱ ምን ውሒዘን እግል ልሸክፍ፡ ትግረይት ቀየረው፡ ህቱ ወዐሊ ወመሐመድዐሊ ሳልሕ፡ “ህለው ሀዳናይ” ሀዳናይ ህሌክ ምስልዩ? ለልብል ሬድዮ ቃእድ ከቲበትነ ክትት እንዴ ኢነሰእ አርድ አትባርህ። ሐቆ ጽብሕ ምድር ህለው ሀዳናይ? ቤለ አዜመ።

“እሰመዐክ ህሌኮ ሸዐብ” በልሰ ዐሊ ሀዳናይ።

“በገ! እለን ለነሐርከ ባጽሓት ለሀለዩ፡ እበ ዕንግሌለ እደይ አንፈን ዝበዋ እተን። ከም ብሬን ህለየ ምስልክ? ኮይሰ ፍህምክ ህሌኮ ሸዐብ ዐነድረን እግል እሸውዋ እተን ቱ። “ክልኤ ብሬን”፡ በልሰ ሀዳናይ።

በገ! እግሉ ብሬናት እት ድፈዕ አፍግረን ወእንተ እበ ህለው ምስልክ መጃምዕ እት ድፋዓተን ሕለፍ እተን” ቤለ ሸበቅ ከአማውር ዐስከሪ ሓለፈ፡ እቱ እግል ቃእድ ሰሪየትነ (ሐይሊነ) ለዐለ ዐሊ ዘረ።

ሙሰውር- ኩባር ጸሃፊ

እስታዝ ሳልሕ ዑሳማን ሻኩኪ ሙዲር መክንብታይት፡ ምግባይት ወካልኦይት ደረጃት መድረሰት ኑር-አልፈጅር ጋሕቱላይ ቱ፡፡ ዲቢ ለሐልፈ ወክድ ሰሕፊ አድም ኦብሐረሽ ምስል ጀማባቱ አስክ አቅሊም ቅብለት በሐር ቀየሕ ሱፍራም እቱ ለዐለው መድረሰት ኑር-አልፈጅር ወተክፈርዮም ለሀሌት አጅያል ሃድጋም ዐለው፡፡ ታምም ጽበጥ ዲብ እለ ናይ ዮም ጥብዐት እንቀድሙ እግልኩም፡ ቅራኦት በኪተት፡፡

መድረሰት ኑር-አልፈጅር ዲብ ሰነት 1992 እብ ሸዑብ ለትቤክ ክልኤ ፈሰል እብ 74 ደረሳይ አሰብዔት፡ ምን ዶል ዲብ ዶል እት ትጠወር ህይ ዲብ እለ አዜ ለሀሌቱ ናይ ካልኦይ ደረጃት ምህር ለትህይብ ባጽሐት ህሌት፡፡ ደረሰ ናይ እለ መድረሰት መክንብታይት ወምግባይት ለደርሶ ደረሰ ምን ጋሕቱላ ለመጽኦ እት ገብኤ፡ ናይ ካልኦይት ደረጃት ህይ ምን ደንገሎ፡ ደማሰ፡ መትክልኤቡት፡ ሸባሕ ወዐድሹመ ለመጽኦ ቶም፡፡ እሎም ደረሰ እሎም ምን ረዩም እብ ዐጀላት ሰበት መጽኦ ሰኒ ልትዕቦ፡፡ እብ ሰብብ እለ ለበዝሐው አስክ ቦርዲናት እግል ሊግሶ ለሐዙ ወእግል ሊጊስ ለኢቀድር፡ ሰሩ ዲብ እለ ጋሕቱላይ ኦብያት እንዲ አጀረ ደርሰ ወሰሩ እብ ዐጀለት ዲብ ለአትቀባብል ደርሰ፡፡ ለተክደርሰ እብ ሀገጊት ህይ ዲብ መክንብታይት እብ ሂገ ዐረብ ወምኑ ወለዐል እብ ሂገ እንግሊዝ ቱ፡፡

ዲብ ናይ ዮም ዓመት ሰነት ድራሰት አክል አዩ ደረሰ ህለው እግልኩም ወክም ሙደርሰ?

ደረሰ መድረሰት ኑር-አልፈጅር ዲብ ሰለሰ ደረጃት እንክፍሉ፡ ከምስልሁመ ዐረዮት ህለው ወረውደት ዲብ እለ ዐድ፡፡ እብ ረውደት ዶል ነኣትብት፡ ዮም ዓመት 90 ደረሳይ ህለው፡ 46 ምኖም አዋልድ አንሳት ወ44 ውላድ፡፡ መክንብታይት ህይ 283 ውላድ ወ219 አዋልድ ዓም 502 ደረሳይ ህለው ዲብ፡፡ ዐረዮት እለ ደዋሒነ ሰብክ ሳግምቱ፡ ሰበት እለ ዕምር ድራሰት ለሐልፈዮም እብ ብዝሐ ልትረከቡ፡ እግል እሎም በክት እንዲ ተህዩቡም ናይ ዐረዮ ተዕሊም ፍቱሕ እግሎምቱ፡፡ ናይ መክንብታይት ደረጃት ዲብ ሰለሰ ሰነት ክም ደሩሰ ወሰሳይ ክም በጽሐው ዲብ ንዝም



እግቡይ አድረሶት ክም ለአተላላ ገብእ፡፡ ዕሙማይ ህይ 84 ደረሳይ ህለው ምን እሎም 47 አዋልድ አንሳት ተን፡፡ ምግባይት ደረጃት 279 ደረሳይ እት ገብኦ ምን እሎም 133 ውላድ 146 አዋልድ አንሳት፡ ዲብ ካልኦይት ደረጃት 128 ደረሳይ ህለው እግልኩ፡፡ ዐደዶም ልውሕድ እብ ለህለ ህይ ሰርም እብ ድዕፍነ ዲብ ናይ 8ይ ፈሰል እምተሓን ጀነራል ሰበት ተርፎ ወሰርም አስክ ቦርዲን ሰበት ገይሶቱ፡፡ እብ ዓመት ደረሰ ናይ እለ መድረሰት ህይ ምን መክንብታይት አስክ ካልኦይት ደረጃት ዶል ልትርኤ 542 ውላድ 451 አዋልድ አንሳት ክሎም 993 ደረሳይ ህለው ዲብ፡፡

ሙደርሰን ረውደት ዶል እንርኤ 2 አዋልድ አንሳት ህለዮ፡፡ ዲብ መክንብታይት እብ ዐረብ ለልክደርሶ 15 ውላድ ወ5 አዋልድ አንሳት 20 ሙደርሰ ህለው፡፡ ዲብ ምግባይት ደረጃት 6 ውላድ 2 አዋልድ 8 ሙደርሰ ህለው፡፡ ወዲብ ካልኦይት ደረጃት 20 ውላድ ወ4 አዋልድ አንሳት 24 ሙደርሰ ህለው፡፡ ክሎም ሙደርሰን መድረሰት ኑር-አልፈጅር 41 ውላድ ወ11 አዋልድ 52 ሙደርሰን ህለው ዲብ፡፡

መድረሰት ኑር-አልፈጅር ብናህ ወኣላተ ከኤፍ ህሌት?

ክመ ዲብ ለዐል ለእቤሉ ተአሰብዔ እት ህሌት እብ ክልኤ ፈሰልቱ ለአሰብዔት፡፡ ሐቆ እለ ምር ዲብ ጀርመን ለኩባር ሙዋጥን ሕኪመት ኤረትርዮ ሰበት ሰምሐት



እግሉ፡ ህቱ ወእሲቱ 7 ፈሰል ወቃዐት ናይ ሙደርሰን ናይ ኮምፒተራት አይሲቱ ላብ፡ መክተብት፡ 3 መክተብ እግል መድረሰት ወመክዘን በን ወዲብ ብክ ተክደርሰ ህሌት፡፡ አስክ እለ ህይ መሻክል ናይ ከነባት መገሰይ ደረሰ ምንመ ሳድፍ እብ ሐድ ሐድ ምስል ሰካን ናይ እለ መንጠቀት እት ትትፋህም አዜመ ከራሲ እንዲ ትሸቀ እግል ልምጻእ ቅሩብ ህለ፡፡ ናይ አክትብት ምን



እንርኤ ዲብ እለ መድረሰት ለህለ ካፊቱ፡ ዲብ ናይ ካልኦይ ደረጃት ለህለ ዲብ መክንብታይት ወምግባይ ደረጃት ላኪን ምስል ዕምር ናይ ደረሰ እንዲ ትነፈዐው እብ እግል ለአቅብል ለወጅቡ፡ ገሌ በሌ ወገሌ በዴ፡፡ ሰበት ህለ መሻክልት ሳድፍ፡፡ እምበል እለ ዲብ እለ አርድ እለ ለዐበ መሻክል ለህለ ሐቱ ሓጃት እንዲ ከዘንካህ ብዙሕ እግል ትጽናሕ ኢትቀድርኒ፡ ምስል ሐፋትት ናይለ ምድር ወለ ህሌት ረጠብት አርጸት ወዴ ወከርብ ዲብ መክዘን እንዲ ህለ፡፡ እሊቱ ለዐበ መሻክል ለህለ እንዲኢኮን ደረሰ እግል ልድረሶ ናይ አክትብት ሕዲን እንዲ ሳደፈ ለልክሻቅል ደረጃት አሰብኩ፡፡

በቃዐት ደረሰ ዲብ ተዕሊም ዶል

ንትሃጌ ከኤፍ ህሌት?

በቃዐት ናይ ደረሰ እንርኤ እት ህሌት እብ ብዙሕ እንክረ እግል ንርኢዩ እንቀድር፡፡ ገዩቶም፡ ህቶም ለልክመጽእው ደረጃት፡ ናይ ዋልዴም ወናይ ሙደርሰን ኩሉ እለ ምስል ዲብ ጌማም እግል ነኣትዩ እንቀድር፡፡ ሰበት እለ እብ ዓም ልትርኤ እት ህለ ምግባይት ደረጃት ቱ እግል ኒበል እንቀድር፡፡ እግልሚ እግል ደረሰ ለልክሰር እቶም ብዙሕ ሓጃት ህለ ምስሉ ዶል ትርኢዩ ደሐን ህለው እንብል፡፡ ተዕሊም ህይ ዲብ ሐቱ ዶል ተቅዩር ሰበት ኢለክመጽኤ፡ ምንዶል እትዶል ዲብ ሰኔ ገይሰ ክም ህለ ልትርኤኩ፡፡ እብ ገበይ ሙደርሰን ወዋልዴን ገብኦ ለህለ ጅህድ ህይ ምን ሰነት ዲብ ሰነት ተቅዩር ለአመጽእ ህለ፡፡

መሻረከት አዋልድ አንሳት ህይ ሚ ትመሰል ህሌት?

መሻረከት አዋልድ አንሳት እበ ለህለ እሕሳኢያት እንርኤ እት ህሌት



መምህር ሳሌሕ ዑሳማን

ዲብ ረውደት አዋልድ በዝሐ፡፡ ዲብ መክንብታይት ደረጃት መ ደሐን እንርኢዩ ህሌት ወለ ዲብ ዐረዮት ብዝሐ አዋልድ እንርኤ ህሌት፡፡ ዲብ ምግባይት ደረጃትመ አዋልድ አንሳት በዝሐ ህለዮ፡፡ ላኪን ዶል ካልኦይት ደረጃት በጽሐ ለዐደደን ልውሕድ ህለ እለ ህይ ዶል እንርኢዩ ዲብ ግራሁ ብዙሕ አሰባብ ህለ፡፡ ሐቱ ህዳይ ሳድፍ ምን ሳምናይ ዲብ ታሰዓይ እተ ለልሐልፈ እቱ፡፡ እለ ህይ እግል ብዝሐህን ለአነቅሱ፡፡ ካልእ ሳወ ዲብ ክራየት ናይ አዋልድ አንሳት ድዕፍ ልትርኤ፡፡ እለ እግል ሳረዮት ህይ ብዙሕ ተዕቢኣት ወሐብሬ ሀብኩ፡፡ አዋልድ አንሳት እንዲ ደርሰዩ ሙስተወ እግል ልብጸሐ ወእግል ልድረሰ ክም ወጅቡን አስክ ዲብ መድረሰት እብ ሙዐልማት አዋልድ ሐብሬ ናይ ሂበት በርናጅም ወዴኩ፡፡ እለ መድረሰት እለ፡ ለደረሰ አዋልድ ሙደርሳት ምስለን እንዲ ገብኢዩ መሻክልን ልርኢዩ ወእምበል ፈርህት ለህለ እለን መታክል ገንሐ፡፡ እለ ህይ ተቅዩር ለአመጽእ እተን ክም ህለ እግል ንርኤ ቃድራም ህሌት፡፡ እሰባት ናይ ህይ አስክ ሳወ ለገይሰ ብዝሐ አዋልድ እንዲ ዘይድ መጽእ ህለ፡፡

ደረሳይ ዑፋይ ወርያደት ለማርሰ እግል ልግበኦ ከኤፍ ትጸቡጡ?

ሰልፍ ደረሳይ ዑፋይ ገብኦ ምን ገብኦቱ እግል ልድረሰ ለቀድር፡ ሰበት እለ ደረሳይ ዑፋይ እግል ልግበኦ እብ ጃንብ ናይነ ናዲ ብክ ዓፍየት ደረሳይ ለታብዕ፡፡ እለ ናዲ እለ ክል ፈጅር እግል ደረሰ እብ ሰበት ዓፍየት ሐብሬ ለህይብ ወሕማም ሳደፈ ምንገብኦ ለሕመም ለህለ ደረሳይ አስክ ሕክምን ዲብ እለ ምስልን ለህሌት ዕደደት፡ አስክ ናይ ዴሽ ዲብ ድግድግቱ ለህሌት ወአስክ ግንዳዕ እንዲ ጌሰ ክም ልትሳፈ

ገብኦ፡፡ ናይ ርያደት ህይ ደረሳይ አክለ ርያደት ለፈትወ ተዕሊም ምን ፈቱ ብዙሕ ተቅዩር ወወዴኩ፡፡ ለረቅቡቶም ሌጠ እንዲ ኢገብኦ ክም ጅዙእ ናይ ተዕሊም ጸብጠመ ሰበት ሕነ ዲብ እለ መድረሰትነ 3 ሙደርሰ ናይ ርያደት ህለው እግልኩ፡፡ ምን ሰዐይ አስክ ናይ ኩረት እግር ሾሊቦል ወባስኬት ለታብዩ ዲብ ፈሰል ህይ ክም ሕሰት ትትህዩም፡፡ እብሊ ለርያደት ዲብ ኩረት ሌጠ ባዋረት ኢኮን፡፡ ጅግራታት ህይ ናይ ኖሰነ ወምስል ደዋሒነ አስክ ምስል ግንዳዕ ንትጃገር፡፡ እብሊ ለመሻረከት ወንዶት ህሌት እቶም እግል ኒበል እንቀድር፡፡

ደረሳይ ፍቲ ሸቅል እግል ልጠውር ወዲብ መንጠቀቶም ለገብኦ አሸቃል እግል ልሻርኮ ከኤፍ ትጸቡጡ?

ዲብ እለ መድረሰት ናዲ ገማል ብኩ፡ እንትባህ ለናዩ ህይ ቀበት እለ መድረሰት ዕጩይ ሸትላት ወከድረ ክም ገብኦ፡፡ ደረሰ ናይነ ሸቅል እግል ልፍተው እብ ገበይ ሙደርሰኖም ዕጩይ ሐዲስ ህለ ምንገብኦ፡ ሸትሎ ወእግል ቀዲም ክል ደረሳይ ናይ ዕጩት እንዲ አመረ ክም ራዕዩ ገብኦ ወዲብ ክል ሰንበት ንኢሸ ህይ ኬወ ማእቶት ገብኦ እብ ሕበር ምስል እንዲ ገብኦው ለሸቅወ ወድዋርም ለአነድፎ፡፡ ምን መድረሰት ወኪን ህይ እግል ሸዑብ ሰዳይት ለወዱ እተ አምዕልተ፡፡

ደረሰ ለመድ ቅራኦት እግል ልልመዶ ለገብኦ ለገብኦ ጅህድ ህይ?

ዲብ እለ መድረሰትነ ደረሰ ለመድ ቅራኦት እግል ልጠውር መክተብት ብኩ፡ ዲብ እንዲ ጌሰው እግል ልራጅዮ እብ ሙደርሰን ክም ዋጅብ ደረሳይ ልትህዩም ወዲብ እንዲ ጌሰው ምን ክቱብ ሌጠ እንዲ ኢገብኦ፡ ምን ኮምፒተር ሶፍት ኮፒ እንዲ ኢተርፍ እግል ልራጅዮ ወእተ ከምስልህ ናይ ለበራቶሬ ሙሃንድሰ ሰበት ብኩ፡ ዲቡ እንዲ መጽኦው ብሕሰ እግል ሊደው ወእግል ልፍሆመ ጅህድ ገብኦ ወእብ ንዝም ክም ልትጸበጥ ወታብዕወ እንወዴ፡፡ ክሎም ደረሰ ህይ ሕሰር ናይ ቅራኦት እግል ሊደው ወደረጃት ተዕሊምም እግል ልጠውር ልትከደም እቱ ህለ፡፡



መጅልስ ዓም መዝመት ምጅልስ ቅራን፡ ምድልቱ ምን መርሐለት መሓደራት ዲብ መርከዝ ቀራራት ለልትዐዳ

ቀራር ምጅልስ አምን ዕልብ 2444 “ዲብ ኤረትርየ ለትቀረረ መኔዕ ሰለሕ፡ መኔዕ ሰፈርያት፡ ጀመዶት ረኣሰ ማል፡ ወለመሰሉ” ክምሰል ትረፈዐ ለሰሐብር ተ። ዲብ እሊ እግል ነሐብሩ ለነሐዜ፡ ለመኔዕ እግል ርፍዐት ለቀሰብ አሰባብ አመሮት ተ። ለቀራራት ምን ኤረትርየ መኔዕ እግል ርፍዐት ክልኦት አሳሲያም አሰባብ ቀደመ። ህቱ ህዬ እብ አሳሲ ቀራር ምጅልስ አምን እሊ ለተሌ ተ።

2^ይ ወናይ ደንበበ ክፋል

ኬተባይ ዶ/ር አሐመድ ሐሰን ድሕሊ መተርጎማይ መሐመድ እድረሰ መሐመድ



1- ምጅልስ አምን እግል ቀራር ዕልብ 1907 (2009) ዲብ ክልኤ ንቅጠት 16 ወ17 እንዴ አሸረ፡ መራቅባይ ሐሸም ልግበእ ወዲበ ሐልፈ አርበዕ ዕምር ሰልጠቱ፡ ኤረትርየ እግል ሐረከት ሸባብ ክምሰል ትሰዴ ለለኦክድ ደሊል ክምሰል ኢረክበ ለሐብር።

2- ዲብ ኤረትርየ ለምን ተዕዲን ለልትረከብ እተይ እግል ቀራራት ዕልብ 1844 (2008) ዕልብ 1862 (2009) አው ዕልብ 1907 (2009) አው ዕልብ 2023 (2011) ዲበ ከይድ መዋዲት ክምሰል እግል መተጠርፊን ሐረከት ሶማል ሰዓይት ቀደሞት ክምሰል ኢወዐለ ሸርሐ።

ለለኦትፈክር ምጅልስ አምን እግል ኢቃትናይ ቀራሩ ምን ሕኩመት ወሸዐብ ኤረትርየ ክምሰል ረፍዐቱ። ለገብኦት ዐፎ አው ዲብ መደት እዳረት ርኢሰ በራክ አባመ ዲብ ረኣሰ ኤረትርየ ለጀረ ሲያሲያይ ጀሪመት ናይ ሐምሲተን ሳብታት አንፋር ምጅልስ አምን ለሳደቀዩ እቱ፡ ዝያደት ራትዓት እግል ልግበእ አርበዕ ደውሉት ለአየደያሁ ወቻይን ክርን ለኢህዐት እቱ ክምሰል አሰልፍ ለትሸረሐ ለኢትቃወመቱ ካጢ ቀራር ለሰበበዩ ከሳር ዐባይ መዕነውያይ አው ማልያይ ከሕሰ ኢቀደመ። ሕኩመት ኤረትርየ እብ ገበይ ለትፈናተው መስኢን እንዴ ወዲት፡ እግል ምጅልስ አምን መራቅባይ ሐሸም ሶማል ወኤረትርየ እግል አቅረበወ ጊጊት ሸክወት እሰባት ሐቆመ ሶም፡ እግል ለአቅርቦ ሐድ ዎሮ ዕቁድ ዲብ ትሰኣል ጸንሐት። ምናተ ለሊከ ቀርብ እተ ለዐለት ጀህት ለትሰሚዕ እዝን ይዐለት እሊ፡ ምጅልስ አምን እግል ቀራሩ ለአመሰምሰ እቡ ወለ ዎሮ ደሊል ሳብት ሰበት ይዐለ እሊ መባዋሩ “ወለ ትፍረር ጠሊት ተ” ቱ ለዐለ።

ምጅልስ አምን ምን ለተኣሰሰ እተ ሰነት 1945 እንዴ አሰተብደ ዲብ ብንዮቱ ታሪካይ ወሲያሲያይ ነቃሰ ክምሰል ዐለ እቱ እብሊ አሰልፍ ለትሸረሐ ዋዴሕ ተ። እለ ነቃሰ ዐባይ እለ ህዬ ዲበ ሐልፈየ 79 ሰነት ሐል ኢረክበ። ናይ እሊ ሰበብ ህዬ ለሐምሰ ሳብታት አንፋር ምጅልስ አምን እግል ረክባሁ ታሪካይት ወሲያሲያይት ቅረዲት እግል

ልእዘመ ምኑ ሰበት ኢሊሐዝያ ተ። ለምን ወቅት ዲብ ወቅት እግል አርተዖቱ ናይ ከሬዕ ሐቅ እበ ከሰሰ አሳሲያይ ተቅዩር እግል ዊደት ብዝሐ ሳብታት አንፋር ምጅልስ አምን እግል አፍላሐት ቀርብ ለዐለ አፍካር፡ እግል ምኑሐ ጥምሑም ለለኦክድ ሰበት ኢኮን ህዬ ልትቃወማሁ። ለለትፈክር ሚርሐት ሳልሳይ ወካልኤይ ዐለም እብ ጀህቶም፡ ዶር ምጅልስ አምን ወንምል ምጅልስ ናይ መዝመት ምጅልስ ቅራን ምሰል ተሐድያቱ ሚሊንዩም ሐዲሰ እበ ልትመሳኔ ወቀዩ ወመስኦልዩቱ እግል ሰይሐት ሕኔት ከድም፡ ለዲብ ምጅልስ አምን እግል ልትዐወቶ እቱ ለልትሐሎሙ ብዝሐ መናብር ዲብ ሳብታት ወኢሳብታት አንፋር እበ ከሰሰ ተርጀመት ለአለቡ መክሐደ እግል ሊደው ወቅቶም ወመቅደረቶም ዲብ ለአትፈርሮ ልትረኣው። ለአምን ክምሰል እሊ ሐቆመ ገብኦት በገ፡ ዲብ አግቡይ ብንዮት መኣሰሳት ወሚሳቃት ወመባድእ መዝመት ምጅልስ ቅራን ዶር ምጅልስ አምን እብ ፍዕል ወጽቦዋ እግል መስለሐት ክለ እድንያይ መጅተመዕ እበ ከድም ተቅዩር እት ፍዕል እንዴ ኢልውዕል ገሌ ድወል ዲብ ምጅልስ አምን መናብር እግል ልትህየበን ለወድያሁ ዐሎጥ ተርጀመት አለበ።

ዲበ ቃረት መጅተመዕ ዱቅሪ ልግበእ ወእብ ወለት ገበይ ለከሰሰ ቅደይ ወቀራራት ጀላብ እግል ኢልንሰኡ፡ እግል ኢልሻርከ ዊደት ከቡት ኢኮን። ድወል አፍሪቀ ዲብለ ምን 2-4 ጁን 1997 ዲብ መዲነት ሀራሬ ዝምባበዌ ለወደያሁ ሙእተመር ሚርሐት፡ ዲብ ምጅልስ አምን ክልኦት መናብር ምሰል ናይ ከሬዕ ሐቅ ክምሰልሁሙ ሐምሰ መናብር ናይ ዶር ዕድውየት እግል ለህሌ እለን ጠልበዩ። ምናተ ሰኣለን ሴምዓይት እዝን ኢረክበ።

እዳረት አሚሪክ፡ እግል ድወል አፍሪቀ ዲብ ምጅልስ አምን ክምሰል ክለን ሐምሰ ሳብታት አዕደ ድውለ ክልኦት ናይ ከሬዕ ሐቅ ለቡ መናብር እግል ልትህየበን እብ ሚርሐተን ለአቅረበያሁ ጠለብ ትም እንዴ ትቤለ ሰሚዕ ክምሰል ይዐለ፡ ሰፊር አሚሪክ ዲብ መዝመት ምጅልስ ቅራን ሊንደ ቶማስ ግሪንፊልድ ዲብ ዮም 12 ሰብተምበር 2024 ቅብብ ወምክሔ ለትመኣ ዲበ ሀበቱ ሸፊሕ “እዳረት አሚሪክ፡ አፍሪቀ ዲብ ምጅልስ አምን ናይ ከሬዕ ሐቅ ለአለቡ ክልኦት መንበር እግል ለህሌ እለ ለለኦድቱ” እት ትብል ሸርሐት።

እሊ በህለት ህዬ፡-
1- ሀለዮት ቃረት አፍሪቀ ዲብ ምጅልስ አምን እግል አተምሰሎት እግል ልግበእቱ ልትሐዜ ለህሊ። ለለኦትፈክር፡ እዳረት አሚሪክ እግል ሰማን ዕቁዳት ዋዲ ለህሊ ዲብ አፍሪቀ ለጀረ ታሪካይ ወሲያሲያይ ጌጋታት ክምሰል እሊ አሳሲያይ ሐል ለለኦመጽእ እሊ፡ መባዋር አሚሪክ እብ ድወል ንምውዳቅ ጸሓይ ሰዓይት ረክበ። አፍሪቀ እምበል ናይ ምውዳቅ ጸሓይ ሰዓይት ክምሰል ኢተህሌ እንዴ ወደውቶም ለሸርሐው።
2- እግል ቃረት አፍሪቀ እብ ግዲደ ሀተነት ወቅብብ ምን ወክድ እስትዕማር ለአተላላ እት ገብእ፡

ለለኦስፍ ህዬ ሐቅ ሕርየትመ ምንገብእ ለአተላሌ ለህላ ተ። ድወል አፍሪቃመ ምንገብእ ትም ምን ቤለዩ መስኦልዩት ለረፈዓ ተን።

3- እዳረት አሚሪክ ለግራህን ህለዩ እግል ሐድ ሰማን ዕቁዳት ናት ከሬዕ ሐቅ ለትነፈዐ ለዐለዩ ለተርፈየ ሳብታት አንፋር ምጅልስ አምን፡ እግል እሊ እምበል ገበል እበ እተ ወክድ ለህይ፡ ሐቅ ካልኣይ ሐርብ እዲነ ለዐለ ታሪካይ፡ ሲያሲያይ ወዐስከርያይ ቴለል ለበሐተያሁ ናይ ከሬዕ ሐቅ እግል ልሕደገ ዱሉያት ኢኮን።

እብ ናይ ወግም ክምሰል እት ክታብዩ “ትልህዩ ዐባይ ወምዕራፍ ሰቦ” ለሸርሐክው፡ መዝመት ምጅልስ ቅራን ምሰል መኣሰሳት ክምሰልሁሙ ምጅልስ አምን፡ ዲብ 21ይ ክፈል ዘበን፡ እብ መንገኦት ፋይሐት እግል ልኦቱ እግል ሳዱፋ ወጠኒያይ ናይ መንጠቀት ወቃረት ክምሰሁሙ እድንያይ ተሐድያት ምሰል ክሉ መሐለኪቱ ወበቃዕቱ እግል ልጋብህ ገብኦ ምንገብእ፡ እግል ተክዊነ ወለልትሐክም እቡ መባድእ ምሰል ሓለት እለ ለህሌነ እቱ ቀርን እበ ልትመሳኔ አግቡይ ናይ ዐገል ጌማም እንዴ ወደ እግል ለዐግሉ በ። ሐሬ ህዬ እግል ሳድፍ ተሕድያት እብ መሻረከት ክሎም ጀሃት እግል መስለሐት ክሉ እበ ትከድም ገበይ እብ ፕራግማቲካዊ እብ ልባብ እግል ትሕለሉ ትቀድር። ክምሰልሁሙ እግል እሊ እብ ናይ መደምራይ ሰለሕ ጀግራ፡ ዐሚም፡ መሻክል ማልዩት፡ ሸለል እቅትሳድ፡ አሰሐባብ ሐገሌብ ሸቅል፡ ብዝሐ ገበል ድብር ወሕማም፡ አሰሐባብ ቅዌት፡ ብዝሐ ዐለዮ ወሰኮት ክሰሐ ድዋር፡ እግል ሀለዮት ሐያት ለተኣፈርህ ሓለት ጀው ምን ናይ ምክሔ አፍካር ለልትበገሰ ኢፋሉታይት ዛህረት ዐውለመት ክሉብ ለህሊ ሸዐብ ዐለም፡ ምስተቅበል ሰኔ እግል ለህሌ እሊ

ለቀድር። እሊ ክሉ ሳኪን እግል እሊ ኣዜ ለህሊ ሸክል ምጅልስ አምን መዝመት ምጅልስ ቅራን ለታቤዕ ወእት ፍዕል ለተአውዕል ጀህት ተንፈዝዩት እንዴ ኢበደልከ ለልትኣከድ ኢኮን።

እሊ በህለት ህዬ እብ ፍዕል፡ እግል ዓር ምጅልስ መዝመት ምጅልስ ቅራን ነሻዋ ወምን ናይ አዋይን መሓደራት ወኣሰውድክ ሰዲድ ተርጀመት ለአለቡ ከሊማት ሰምዐት ወመባድእክ ሸርሐት ምን መትነባይ ለኢሊሐልፍ ሸዑር ወሓዜ እንዴ ሐልፈ ዲብ ፍዕል ዶል ልትዐዳ ተ። እብሊ ህዬ መዝመት ምጅልስ ቅራን፡-

- 1- እት ፍዕል ወለተአደሚዕ መዝመት እግል ትግበእ።
 - 2- ሐምሰ ሳብታት ድወል ዕድውየትን ወናይ ከሬዕ ሐቁቀን እንዴ ትነፈዐዩ ዲመ ህተን ሌጠ ለራቅባሁ እንዴ ኢገብእ፡ 193 አዕደ ድወል ለመልክ መዝመት ገብእ።
 - 3- መሳሌሕ ገባይል ዲብ ኖስኖሱ ሕድ ለለኦተምም ወለለትቃርብ ዲኢኮን፡ ለለኦትራይም ወለለኦትብእሰ እንዴ ኢገብእ ህዬ፡ ናይ ክለን ድወል ገባይል መዝመት ገብእ።
 - 4- ዲብ ደንበበ፡ ዓም ምጅልስ መዝመት ምጅልስ ቅራን ምን ምን 1945 እንዴ አሰተብደ እምበል ተርጀመት ለከልኣዩ እንዴ ትባለሐ፡ ናይ መዝመት ምጅልስ ቅራን አሳሰ ወሚርሓይት እግል ትግበእ ትቀድር።
- ሕኔት ቅራራተ እብሊ ኢትቀሰብ ናይ መሓደራት አዋይን ዲብ ምግብ ናይ ሕበር ሲያደት ናይ ክሉ ንሳል ረሰሚ ወመሻቀዩ እግል መሳሌሕ ክሉ ለከድም ትትዐዳ። ክእነ ዶል ገብእቱ ቀራራት ዓም ምጅልስ መዝመት ምጅልስ ቅራን መቀሰባይ ለገብ። መዝመት ምጅልስ ቅራን እብ አማን ክምሰል ሰሚተ።

“እብ ደሐን እም ወውላደ ባርህ ሙስተቅበልነ ነኦድምን”

ልእክት እድንያይት ምዕል ዓፍዮት (7 ኣፕሪል 2025)

ክል ሰነት፡ እት ዐለምን ሰለስ ምእት ኣልፍ ለገበአ ኣንሳት እብ ሰብ እት ወክድ ዕምስናህን ለሳድፍ ለተሐባለካ ቴለል ዓፍዮት፡ ኣውሙ እት ወክድ ውልደት፡ ምን እለ እዲነ እብ ሞት ልትፈንተዮ፡ ዝያድ ክልኤ ሚልዮን ዓሉቅ ሀይ ወሬሕ እንዴ ኢለኣደውሮ መይቶ፡ ሐድ ክልኤ ሚልዮን ለገበአ ዐለቅ ሀይ እት ከብድ እምም መይቶ፡ እሊ እትሊ እያም ቅሩብ መዝመት ዓፍዮት እዲነ ለነሸረቱ ተቅሪር ቱ፡፡

እሊ ሞት እማት ወኣጀኒት እት ክለ ዐለም ለሀለ ምንማቱ፡ እተ ድወል ለድቡራት በዜሕ፡ ኣግደ ለእብ በረ ወጅወ ነበር እንዴ ቀንጸ እተን ሃብ ሐርብ ለብልቡ ለሀለ ከፈፍል ዐለም በዝሕ ወፊደሕ ሌጠ እንዴ ኢገብእ ለትኬለመ ሸክል ብእቱ፡፡ ክድመት ዓፍዮት ለለሀይበ መኣሰሳት ልትደበኣ፡ ሀጁም ገብእ ተን፡ ልትዘመተ ወልትራሰዮ፡፡ እሊ ሀይ እግለ እብ ገበይ ንዝምት ልትሀዩብ ለዐለ ክዳማት መራዐዮት ዐመሲ እግል ለኣትካርም ሰበት ቀሰቡ፡ እማት ወዐሉቅ ኣረይ ሞት ወሀዘን ወድዮም ሀሉ፡፡

መዝመት ዓፍዮት እዲነ እት ሰነት 1948 ምን ትትኣሰስ ኣሰክ እሊ፡ ሰነትክ እብ መናሰበት ሰቡዕ ኣፕሪል እብል ትወድዮ ድራሳት ዓፍዮት ወምኑ ለትረክበ ሐብሬ ዲበ እንዴ ተንክበት፡ ሕሰር ፍንቱይ ለለኣትሐዝዩ ቴለል ዓፍዮት ዐለምን እንዴ ኣሸረት፡ ኣንፋረ ላተን ድወል ዲብ ኣይ እንዴ ረከዘዩ እግል ልሸቀዩ ክም ብእተን ረሰሚ ተፋሲል ሸሬሕ ተሀይብ፡፡ እብ ኣሳስ እሊ ዮም ዓመት (2025) እት ዓፍዮት እማት ወዓሉቅ፡ ምን መደት ሕነት ኣሰክ ውልደት ወሐቀ ውልደት ለሳድፍ መሀባልክ ዓፍዮት ኣሰክ ሞት ወምስክ ለለኣበኤኡ ዐዋምል እንዴ ፈርግኩ፡ እግል ትግበእ ለወጀብ መዳፈዐት ወዳወዮት ለትሸሬሕ ሰቅራት እንዴ ሀረሰት ተፋሲል ሐብሬ ቅድምት ሀሌት፡፡ “እብ ደሐን እም ወውላደ ባርህ ሙስተቅበልነ ነኦድምን” ሀይ ሰቅርት ዮም ዓመትተ፡፡ መጻኢ ነውሕስ!”

ሸከረትለ ሰቅራት፡ ሐያት ምን ሕነት ሰበት ተኣነብት፡ ኣግማም ሙጅተመዕ ዐፋይ እት እንቱ እግል ለኣተላሌ ለእግል ደማን ዓፍዮት ለገብእ ጅሀድ ምን እለ መርሀለት እለ እግል ለኣንብት ብእቱ፡፡ እለ ኣጃንደት ፊራር(እስትሰማር) ሕኩማት ወገባይል፡ ክለ ጸገሞም እት ክድመት ዓፍዮት እማት ወዓሉቅ እንዴ ኣትወለበወ፡ ኣመተ ኢድሊት (ለኢትሰኢት) ሞት እማት፡ ዓሉቅ፡ ኣግሩዝ ወኣጀኒት ክም ኢተሀሌ እንዴ ገብኣት፡ ኣተላላይ ሙጅተመዕ ኣድመናት ቱ፡፡ እለ “ እንብተት ዑፊት፡ ሙስተቅበል ሰኢ” ትብል ለሀሌት ሰቅራት ዮም ዓመት፡ ለሸከረተ “ደሐን እማት ወኣጀኒት እንዴ ኣድመን ሰኢት ሙስተቅበልነ ነኦድምን” ለትብል ልእክት ለብእታተ፡፡

ዲብ ኤረትርዮ ክድመት ዓፍዮት እማት ወኣጀኒት፡ ዎሮ ምን ኣውለውያት እንዴ ተሀዩብ ለትሸቄ እሊ ለሀለ ክዳማት ቱ፡፡ ኣፍይሖት ብንዩት ተሕትዩት መኣሰሳት ዓፍዮት፡ ዶልክ ፈሬ ለሀለ ምህነት ለተኣለለመ ኣዳም፡ ኣትኣታይ ዘበናይ መትሻቀዩ ዓፍዮት፡ ምስለ ልትሸቄ እቡ ለሀለ ዐገል(ፖሊሲ) ወስትራቴጀዮት ዓፍዮት እብን ኣሳስ እግል ዓፍዮት እማት ወኣጀኒት ቶም፡፡ እሊ እቱ እንዴ ተንክብክ ፈሀም ሙጅተመዕ ለወቅል ወለለኣፈይሕ ወእት ጠባይ ተቅዩር ለለኣመጽእ ተዕቢኣት፡ ክድመት ክሸፍ ዐመሲ ውላደት ወሐቀ ውላደት፡ ክታበት ኣጀኒት፡ እግል ኣጀኒት ለልትሀዩብ ሙጅተመዕ ለኣቅሩዱ መራዐዮት ዓፍዮት፡ ዲብ ለትፈናተ ደዋሒ ባክ ዕያዳት ብታይ ለሀለ ዐመሲ ለጸነሐ እቱ ኣብያት፡ ወለመስሉ . . . ለኢትቀብብ ፍገራት ትረከብ ምኑ ሀሌት፡፡

እብ ዓላብ ምን ልትሸረሕ፡ ኣወላይት መታበዕት ዐመሲ ሐድ 98 ምእታይት፡ እት መኣሰሳት ዓፍዮት እብ ዕሉማም ለወልደ ዝያድ 80 ምእታይት፡ ክታበት ለረክቦ ዝያድ 98 ምእታይት፡ ክምስልሁም ሞት እማት ወኣጀኒት እብ ኣሳስ መቅየስ እዲነ እት ትነቅስ ትመጽእ ሀሌት፡፡ እሊ ተሀደገ ነታይጅ ኤረትርዮ እግል ዐለም እፍግርተ ለሀሌት ሰትራቴጂ እግል ትብጽሖ ክም ትቀድር መርበይ ጸብጠት ክም ሀሌት ለለኣርኤ ምንማቱ፡ ዕንዳቁን እንዴ ኢነኣርሄ መቅረሕ መቅደረትን እንዴ ወጀህን እብ ደሀን እማት ወኣጀኒት ሙስተቅበልነ ሰኢ እግል ነኦድምን ገለድነ እንዴ ኣትሀደስን ቀደም እግል ነኣሳድር ወጀብ፡፡

እብል መናሰበት እለ ውዛረት ዓፍዮት እብ ደሐን እማት ወኣጀኒት ሙስተቅበል ሰኢ ነኦድምን እት ትብል፡ ሻምል ክዳማት ዓፍዮት እብ ተማሙ እግል ተወውት ሕጡጥ ገለደ እብ ድግማን ዲብ ተኣክድ፡ ክሉም ሰብ ሸርከትመ እሊ ሀደፍ እሊ እት መባጽሖ ኣግል ልብጸሕ ግዴቶም እግል ለኣትምሞ ትትላኬ፡፡ ዝያድ ክሉ ሀይ ሙጅተመዕ ዓፍዮት ሐቁ ወተኣስትህሉ ምን ገብኣት፡ ማልካይ ዓፍዮቱ እግል ልግበእ ክለ ለቀድረ እግል ሊዴ ተኣትፋቅድ፡፡

ውዛረት ዓፍዮት

ሚኒስትሪ ሞዕና
7/4/2025

“እስትንቡረት ዑፊት፡ ሙስተቅበል ባርህ”



ሰቅራት ሰቡዕ ኣፕሪል እድንያይት ኣምዕል ዓፍዮት

ጅነ ምን ልትዐቀድ እት ኣምዕል ናይ ሐያት እንብተቱ ሰኢት ምን ገብእ ወዓፍዮት ለብእተ ገኣት ምንገብእ ሙስተቅበሉም ሰኢ ገብእ፡፡ ውላድ እግል ልሰኢ ለወላዲት ዑፊት እግል ትግበእ ላዝምቱ፡፡ እሊ እግል ተኣድምን ላኪን ቀለል ኢተን፡፡ ሰልፍ፡ ዲብ ፍክር ክል ነፈር ሙጅተመዕ ለሰብቀ ፈሀም ራቴዕ እብ ክሰሰ ደሐን እም ወውላደ እግል ለሀሌ ለኣትሐይ፡፡

ሐቆህ ናይ ማል ወኣዳም ርዝቀክ እንዴ ኣትመቃረሕክ ወላዲት ሰለመት ነፍሰ ወዕቅለ እግል ትርከብ፡ ሐቆ ሰኢት መራዐዮት ቀደም ሕርሱ እት ኣካን ደሐን እግል ትውለድ፡ ሐቆ ውልደት ምን ሕማም ወግድዐት እግል ትነጃ እት ጸገም ልትኣቱ፡፡ ለጸገም ሀይ ዮም ቴክኖሎጂ እቅሉሉ ሀሉ፡፡ ደኣም እትሊ ዘበን ሐብሬ ወቴክኖሎጂ ኣሰክ እለ ኣዜ እት ክል ሰቡዕ ደቂቀት ሐቱ እግል ትከረዕ ትቀድር ለዐለት ሞት ወላዲት፡ ዐለቅ ኣው ግርዝ ትጀሬ ሀሌት፡፡

እብል ኣለት ኣለት እለ

ሰርገል ሰትራቴጂ ዳይመት ዐቦት እት ሸክ ሀሉ፡፡ ሰበቡ ሀይ፡ ምን ክል ሐምስ ደውለት ለኣርበዕ ረደምለ እት ሰነት 2030 እግል ልትበጸሕ ለቡ ሀደፍ ኣውሐዶት ሞት ወላድያት፡ ሐቱ ምን ሰለስ ዱለት ሀይ ረደም ምን ሀደፍ ኣውሐዶት ሞት ዕለቅ ሀሉ፡፡ መዝመት ዓፍዮት እዲነ ኣምዕል ዓፍዮት ዮም ዓመት ወዓመተ ዲብ ደሐን እም ወውላደ ለኣተንክበ ፊራርታት እግል ልግበእ ዲብ ለቀረረት ሀይ፡፡ እለ እግል ትከረዕ ለትቀድር ብቆት እት ሐደ እግል ትብጠር ክምበ ምን ኣምነት ቱ፡፡ እት ኤረትርያመ እት ኣክባር ክምለ ረኤኩሙ ኣትኒን ዮም ሰቡዕ ኣፕሪል ለኣምዕል እብ እህትማም ዐቢ እብል ትፋናተ ዕፌ ዓዳት ወተባድል ሐብሬ ትፈቀደት፡፡

ወላዲት ደሐን ንምደድ እለ

ውላድ ወሀበት ጠቢዐት ምንማቱ፡ ለኢነት ለሀ እም ወውላደ ፍንጌ ሞት ወሐዮት ሀለው፡፡ ለደሐን ዐለውመ ሐዲስ ወሻፍግ ተቅዩር እንዴ መጽኦ እት ሳንያት እት ብቆት ለትካሬ ኣለት እግል ትምጽኦም ትቀድር፡፡ እለ እንዴ ኣመርነ ክል ወላዲት እት ሐንቱ በዐል ምህነት ዓፍዮት እግል ትውለድ፡፡

ቀደም ውልደት መርመራታት እግል ቱዴ፡ ሐቆ ውልደትመ መታበዕት ሐቆ ወሊድ እብ በዐል ምህነት ዓፍዮት እግል ትግበእ እለ ለለቀድር ክዳማት እግል ልትወጀድ ጸገም ትፋድ ወመትሰባል ለሐይ፡፡ ለሀለ ክዳማት እብ ተኣስትህል እግል ትነፈዕ ምኑ ሀይ እግል ንሰደዮ ብኩ፡፡ እምበል ሕርስመ ራሐት ዐቅል እግል ትርከብ፡ ምን ሕማማት ዳይም እግል ትሳሬ፡ እብ ማል ልግበእ ወምክር እግል ንሰደዮ ዋጅብ ቱ፡፡ ለሰዳይት እግል ሌጠ ኢተን ርሕናመ እንሰዴ ሀሌኩ ደሐን እም ወውላደ ደሐን ክሉ ገቢል ሰበት ቱ፡፡

መራዐዮት ዐምሳት (ቀደም ወሊድ)

እም ምን ውላድ ዋድዮት ክም ሀሌት ለተኣገርስ እት ኢነት ኣሰክ ትወልድ ምን ልውሕድ 8 ዶል ሐኪም እግል ትረኤ ሀሌት እሊ፡ ኣላት ኢንቡር ምን ሀለ እት ወክድ እግል ልትፈረግ ወልትሳሬ፡፡

ገሌ ምን እሻረት ብቆት እት ዐምሳት ፡-

መጸጸት ረኣሱ፡ መትኣባጥ ተካይብ ዕንታት ወእገር፡ ደቅዋ ደም ውቁል፡ ነዚፍ . . .

እምበል እሊ፡ ዳይም ሕማማት ክም ከረ ሰከራ፡ ውቁል ደቅዋ ደም፡ ሕማም ልብ ወከላዊ ወለመስሉ ለብእተ ዐምሳት ዝያድ መታበዕት ሐኪም ተሐይ፡፡

ከሸፍ ቀደም ውልደት ለወላዲት እብ ጅመዕ ለለዐዴ ኣምራድ ክም ኤቸ ኣይሺ፡ ሐለግ ወመእረር ከብደት ብእተ ገኣት ምንገብእ እት ወክድ እንዴ ተኣመረ ህተ እግል ትዳዌ ወውላደ ምን ዐደዮ እብ ሰላም እግል ልፍገር በክት ለሀይብ፡፡

ከሸፍ ሐቆ ውልደትመ፡ ነዚፍ እግል ኢለሀሌ፡ ረክሰ እግል ኢቱዴ፡ ደሐን ጅነ እግል ትደሌ . . . ዋጅብቱ፡፡





“ተዋብ ደወርህ፡ ሰብር ወፍቲ ለጠልብ መክሰባይ እስትሰማር ቱ” ዑመር ዩስፍ

(3ይ ወናይ ደንበር ክፋል)

ዲብ አቅሊም ዐንሰበ እስሰት ለህሌት መክሰሰት ተዋብ ደወህ አዳል፡ ዲብ እሊ ናይ ሐድ ርዕዕ ዘበን ዕምራ፡ ደማነት ነበራት ቅዝ እግል አከዶት ዲብ ገብእ ለህለ ጸገም ሐድ መቅደረት ወራታት ዐማር ዲብ አደቃብ እንዴ ኢትትሐለል ትጸገም ለህሌት፡ ናይ ብሕተ መክሰሰት ተ። “ለትጸገመ ልትዐወት” ክምሰለ ልትበህል ህይ እግለ ሳደፊዩ ተሐድያት እብ ካድም ወኢመትሐላል እንዴ ተዐዳት፡ ዮም ደማን እተ በ ደረጀት ውቅልት ህሌት። ዲብ ወጀዶት ዐዳገ ቤጭ ዲብ ህወኖት ዲብ ሰልፍ ርቱብ ለህላ ቱ። ወሰክ ወራታት እንታጅ ሐሊብ ሐ እንዴ ጨምረት፡ ዲብ ህወኖት ዐዳገ ሐሊብ መዲነት ከረን ወባካታመ እብ መሰል ሰኔት ለልትረኡ ዶር ትቀድም ህሌት። መክሰሰት አዳል ናይ ቤጭ ወሐሊብ ፈርያት እብ ኑዕየት ወብዝሐ ዲብ ትወቀለት ደረጀት ለተዐድዮ እስትራተጅዮት እንዴ ኤተነት ገጽ ቀደም ተአለምቤ ህሌት። ምን እሊ እንዴ አትሌነ ግድም፡ ዕመማይ ወራታት ወፈርያት ናይለ መክሰሰት እብ ክሰላ፡ ምስል መመቅረሓይ ሽቅል መክሰሰት አዳል አሰይድ ዑመር ዩስፍ ናይለ ገብእ ፋይሐት መቃበለት ጭመም 3ይ ወናይ ደንበር ክፋሉ ተሌ፡ ቅራኣት በኪተት፡

***ዲብ እሊ ወክድ እሊ፡ መክሰሰት ተዋብ ሐዋን ወደወርህ አዳል ሚ ተእሊር ዋድዮት ህሌት ትብል?**
- ዲብ አስመረ - ዲብ ባካት ሲነመት ዳንቱ ክምሰልሁመ ዲብ ክርስ መዲነት ከረን ድካን እንዴ ክሰትን እብ ዐውል ረኪስ ቤጭ እት ሽዑብ ነኢዘቤ ህሌት። ሽዑብ ብዙሕ ወሰብ መክሰሰት ህይ እንዴ ትዛበው ኢትመጣወራ፡ ነብራመ ቃልየት ሰበት ህሌት፡ እግል ዎሮ ቤጭ እብ ዝያድ 4 ነቅፊ እግል ነኢዘቤ ለአስፈነ።
*** ዐውል ቤጭ ዝያደት እብ ገበይ ራትዐት እግል ልትዘቤ ሚ ምን ገብእ ለሐደሰ ትብል?**
- እብ ጀህትን ብዙሕ ነሐሰብ፡ እግል መሰል ዓስ ወጭመም



ምን እነ እግል ልትንፈያ ቃድራም ህለው። እብ ተውሳክ ዲብ ብዙሕ መክሰሰት ዐባይ ሕክመት ወብሐተ ቤጭ ነኢዘቤ። ገሌ ምን መክሰሰት፡ እስብዳልየት ዐስከርየት ግላሴ ባረንቱ፡ ደቀምሐፊ፡ ሳወ፡ ሸሪካት ተዕዲን ቢሸ ወዘራ፡ ባር ሮያል፡ ጃርዲዮ፡ ጃንቲ ግራፕ ኢታልያኖ ወለመሰሉ እግል ልትህደግ ቀድር። ደረሰ ኩልየት ሐርስ ሐመልማሎመ እብ ዶል ዶሉ ዲብ መክሰሰትን ዲብ መጸኦ እብ ፍዕል ለተለ ምህር ነሰኦ። ሰለሰ መምህራን ናይለ ኩልየት ዲብ መክሰሰትን ዲብ መጸኦ እብ ፍዕል ለተለ ምህር ናይ ማስተረሰ ዲግሪ ድራሰቶም እትመማም ህለው። እሎም መምህራን እሎም ዲብ መክሰሰት የመዋቶም እግልነ ዐውቱ ዐባይ ወሐበን ቱ
*** እግል ሽዑብ እብ ተህዩብ ለህሌትም ክድመት ጋኔዕ እንተ?**
- ጋኔዕ ይኣነ፡ ምስል መናበረት ልትረኡ እት ህላ፡ ዐውል ቤጭ እምበል ሐሰት ቃሊ ቱ ለህላ። ዐዳገ ወዲብ ዐዳገ ለልትከሬ ቤጭ ሰበት

ትዛቤነ። ምስል ወቅት ህይ እንታጅ ሐሊብ ሐ እግል ልጅዘበነ ሰበት አንበተ፡ እብ ገበይ ሰኔት እግል ንጽብጡ ቀደርነ። ውዛረት ሐርስ ዘበናይ ኢትጃናስ አው አዳቃል ሐ ሰበት አናበተት ህይ እግል እሊ በክት እሊ፡ እግል ንትንፈዕ እብ ትብገሰነ። እግል ዐለው እግልነ ወዲብ መክሰሰትን ለፈረው አብዕረት እንዴ አዝቤነ ህይ ዘባናይ አግቡይ አዳቃል ሐ አምበትነ። እብ ዘበናይ አግቡይ አዳቃል ሐ ዕመር ሐሊብ ዲብ በዜሕ ገይሰ። እብ ሰኔት ገበይ ሰበት አተላሊናሁ ህይ ዲብ ክርስ እለን ዐስር ሰኔታት 29 ሐ እግል ንተውብ ቀደርነ።
*** መሰሊሐት ዘበናይ አዳቃል ሐ ሚ ተ ወትቤ?**
- ቀዳማይ ሕሩይ ዘርእ ትረክብ። ሰበቡ ጅንሰ ናይለ ሐ እብ ውዛረት ሐርስ እንዴ ትፈረገት ሰበት መጽእ። ካልኣይ ብዕራይ ህለ እግልክ ምንገብእ ለሰክን እተ ቤቱ፡ ነብራሁ ወነዳፊቱ እግል ተኣትምም እሉ ጅብረነ። ክምሰልሁመ እብ ውህር ብዕራይ ለልትሐላላፍ ሕማማት ዶል ለህሌ ዲብ ውላዱ እግል ለዓድዩ ቀድር። ዘበናይ አዳቃል መትንፈዕ ላኪን እግል እሊ ክሉ መሻክል ለህውን ምንነ። ብዕራይ ገብእ ምንገብእ ላኪን ዲብ ህሌክ እተ ሳዐት እግል ልሰረር እተን ሰበት ቀድር። እሊ እግል ትራቅቡ ለሐይለከ። እምበል እሊመ ውህር ዲብ ረኣሰለ አንሳት ሐ እግል ለአጅርዩ ለቀድር ደረር እግል ተህውን ቱ።
*** እብ ተቅደም ዲብ አምዕል አክል አዩ ልትር ሐሊብ ተሐልዮ?**
- ምን እለን ለህለየ እግልነ ሐ፡ እብ ምግባይ ጌማም ዲብ አምዕል አስክ ዎሮ በርሚል አው 200 ልትር ሐሊብ እንረክብ። ምን ሐቱ ወኣት ህይ ለትቀለ ምን 24 ኣስክ 28 ልትር እንረክብ። ዲብ ከረን ድካን ካለፈሉት ሰበት ብነ፡ እግል ሐሊብ ምንቱ ዲብ ሽዑብ ለነኣዘብዩ።
***ሚ ጅንሰ ነብረ ሰበት ተኣበልዑወንቱ ሰኔ ዕመር ለህይባኩም ለህለየ? ለህለየ?**
- ሐ ሐሊብ አክደር ዐለፍ እግል ልብለዐ በን። ለትበዜሕ ሐሊትን ህይ ዲብ አልፈ-አልፈ (በርሲም) ወዕፋን ቱ ለህለ። እብ ተውሳክ ሰዐር ሐርማዝመ ንትንፈዕ። ምን ሰነት 2020 ወሐር ህይ ሉሲንዩ ለለትበህል ዕጩ ዲብ ጠረፍ ዘሪቡትን ሻትላም ህላነ። ሉሲንዩ ጽበዋ ፕሮቴን ለቡ ማይ ብዙሕ ለኢነሰእ ዕጩ እት ገብእ፡ ውዛረት ሐርስ እብ ለህ ሃይበትናቱ ለዐለት። ሉሲንዩ ምን ቅያስ ወለዐል በዝሐ ምንገብእ ላኪን ሰበት ቀትል፡ እብ ቅያስ ሐድ እግል ልትህዩበ ቡ። እሊ ክምሰል አብለዐናህንቱ ዕመረን ለቀዝር።
*** ዲብ ተዋብ ሐ ሐሊብ እብ ውዛረት ሐርስ መራቀብት ገብእ እግልኩም ማሚ?**



- አኪድ! መራቀብት ዛይደት ውዛረት ሐርስ ትገብእ እግልነ። ሰብ መቅደረት እንታጅ ደወርህ ወሐ ሐሊብ ናይለ ውዛረት ዲብ ወክድ ፍድኢት፡ ዲብ መደት ወሊድ፡ እጋል ክምሰል ትወለደት አው ትወለደ ሚ እግል ልብለዕ ቡ ዲብ ልብል ውብዕድ፡ ዲብ ለትቀባብሎ ሰዳይት ወመራቀብት ወዱ እግልነ።
*** ዲብ ወሬሕ ፈብርዋሪ 2024 ዲብ ገብእ ወጠንያይ ወዕለ ሐሊብ ወፍገሪቱ ሹፋክ ዐልክ ወጃእዘትመ ነሰኦክ ከእብ ክሰሉ ሚ ውቴልክ?**
- ለወዕለ ምን ቀበት ዐድ ወካርጅ ለመጽአው ውቁላም ሰብ መቅደረት ወመትመራምረት እንታጅ ሐሊብ ሐ ወሰናዐት ፍገሪት ሐሊብ ለሻረከው እቱቱ ለዐላ። እብ ፍንቱይ እግልነ ተጃርብ እግል ንክሰብ በክት ከልቀ እግልነ። እብ ፍንቱይ ለእብለትፈናተው ናይ ክርስ ዐድ ወካርጅ ለትቀደመ ውራቅ ድራሳት ተጃርብ ብዙሕ ክሰብ ምን። ሰበት እሊ፡ እብ ሰበት እብ መሕበር ሸቅየት፡ እዳረት ሐሊብ ወመራዐየቱ ወለመሰሉ፤ ሚ መሰል ተጃርቦም ሰበት ካፈለውነ ሰኔ ዐላ።
*** እሊ መጃል እሊ ለክሰሰ ለነሰኣኩሁ ተእሂል ህለ ማሚ?**
- እብ ጀህቲ ዲብ ሰነት 2019



ፈድል ውዛረት ሐርስ ለትክለቀ እግልይ በክት፡ እብ ሰበት እንታጅ ሐሊብ ሐ አስክ ኬንዩ እንዴ ጊሰኮ ተእሂል ናስኦ ዐልኩ። ዐውቱ ኬንዩን መፍርየት ሐሊብ ሐ ዲብ ብዝሐ ሐ ለልተንክብ እንዴ ኢገብእ፡ ዲብ ዑፋያት አው ብቁዓት ሐ ክምቱመ እግል እፍገር ቀደርነ። እብ ተውሳክ ህለየት ካፈ አክደር ዐለፍ እብ

ወሐሳሱ እንዴ ወርኬነ ምን ወእንዴ ዐሽግናሁ አው እት መዐለባት እንዴ ዐሽብናሁ እግል ነኢዘቤ ስታት ብነ። ለህደፍ ክል ነፈር እብ ሕክመት ለአፍገሪቱ ሽክል ሐሊብ እንዴ ሰተ ለለትሐዜ ቅዝ ነብረ እግል ልርከብ ቱ። ምስሎመ ሐሊብ እንዴ አርገኣነ ናይ አዝበየት በርናምጅመ ብነ። ምስል ወቅት ህይ ዲብ አዳላይ ጅብን ውብዕድ እግል ንትዐዳቱ።

ዶ/ር ዐ-መር ዐ-ሰማን

ዐስር ጠባይዕ ፈዳብያም ደረሰ

ሐያት መድረሱት ተፈጻሚ ለተሰማሩ ሐያት እግል ረኪብ ላዝም እግል ትድረሰ ብኩ። ምን እት እድንዩ ክልና ብዙኡ ምን ዕምርኒ ለነሐልፍ እት ምን ተህሌ መድረሱት ተፈጻሚ ብዙኡ ሳታት ምን ዕምርኒ ለተሰማሩ መጽል ህዩ እብ ከክፍ ትትዐወት እቲ አመርት ምህም ገብኤ። ከደረሰ እት መድረሱትም እግል ልሳዕዳም ወድራሱት እብ ለትረዩኡ ወፍገራት ለተአመጽኦ መፍርያይት ገበይ እግል ወዲህ እለን እት ተሐት ለእንሰምየን ንቃዋ እግል ንተሳባ ለአትሐይ።

1. እት ሐጪር ወቅት ብዙኡ አርእሰ እግል ትሕፈዝ ኢትጀራብ። እት ሐጪር ወቅት ብዙኡ እግል ትሕፈዝ ጀረባት። እግል ገበይ ዐደዮት ሐብሬ ምን ናይ ዶላ መክዘን መትዘክር አሰክ ናይ ረዩም ወቅት መዘክር ጨቅት ሰበት ወዲ እቲ። ሐብሬ እብ ገበይ ወእንዲ ነዘመው ኢልትከረው። እት ምግብ ምክራዮም እግል ትትቀዌ ሰበት ቀድር። ዶል ተሐዝዮም ኢትረክቦም አውመ እት ህለው እብ ከክፍ እግል ትትዘክሮም ትቀድር ትባዴ ምንኩ።

ብዕድ እት ሐቲ ወቅት ብዙኡ ጽበዋ ድራሱት እግል ትሕፈዝ ጀረባት ተዕበት ሰበት ሰበብ። ካድምክ ፍግራት ኢትትረክብ ምን። እትለ ተሐደደ ወቅት ሐቆ ሰር ሰዓት። ሳዓት አው ክልኤ ሳዓት ከም መቅደረትክ ናይ ዐስር ሐምስ ደቂቅ ዕርፍ እግል ትንሳኢ ለአትሐይ። ዕርፍ ነሰኢ እግል ለተሐፍዙ ዐልክ መጽል እብ ብዕድ አርእሰ እንዲ ኢልትቀየር እት ምክክ አካሉ ከም ጸበዋ ወዲ። እብ ተውሳክ ዕርፍ ንሰኢት ምክ ከም ልትሐደሰ ወእግለ ተሌ ሐፍዝ ዱሉይ ወፍቶሕ ወድዩ።

እትሊ ላኪን እግል ነአምረ ለብኩ። ለናይ ዕርፍ ወቅት ምን ዐስር ሐምስ ደቂቅ ወለዐል ገአ ምን ገብኤ። ምክክ ምን ፍክር ሐፍዝ እት ብዕድ መጽላት ሰበት ልትዕዴ እግል ንትሓፈዝ እቲ ወጅብ። ሙድ(ሓለት ምክክ) መረ ምህም ተፈ።

ምክክ ክል ዶል እት ለሐሰብ ቱ ለነብር። እብ ጠቢዐት ምክ ወድ አዳም እንዲ ኢልሐሰብ እግል ልትገሌ ኢቀድር። ሰኢ ሐቆ ኢሐሰብክ እቡ ወእት ፍገራት ለቡ ካድም ኢፈረርካህ እት ብዕድ እግል ሊጊሰ ላዝም ተፈ።

2. ናይ ሐፍዝ እመር ወቅት ህለዮት

‘ሐፍዝ ዶል እትሸነህ እግል ሕፈዝ ቱ። እትለ ትወጠ እዬ ወቅት እግል ሕፈዝ ቱ አውመ እምተሓን

ህለ እኩም ክም ቤለውን እግል ሕፈዝቱ’ ለልብል መፍሁም ራቴዕ ኢትን። የምክን ክምሰልሁ ወዲ ከተዐወትኑ ለልብሉክ መልሂትክ አው ውላድ ፈሰልክ ህለው ምን ገብኤ። ምተአክድ አው እት ፍገራቶም ሓምቃም ቶም አውመ እግልክ ክምሰልሁ እት ልብሉክ ላሊ ወአምዕል ለሐፍዙ ለህለው ቶም።

ክም እሊ አፍካር ምን ምክክ እግል ነአሪመ ወጅብ። ሸቅል ፈሰል ልግባኦ አው ሸቅል ቤት ለህሌ እን መኢለህሌ እብ ለኢከሰሰ። እብ ትሉሉይ እግል ንሕፈዝ ወጅብ። ክለ ምዕል እግል ሕፈዝ ቱ በደል ትብል ህዩ። ምን ሳዐት ክእን አሰክ ሳዐት ክእን። እለ ሕሰት እለ አው አርእሰ እለ እግል ሕፈዝ ቱ በል። እመር ወቅት ሐፍዝ ህዩ ለህሌ እግልኩ። ምክክ ዋድሕ ኤታን ናይ አግደዮት መቅደረቱ ውቅል እት ገብኤ። ናይ የምክን መመቅያሰ እምር ጽበዋ ለአለቡ መጽል ብዙኡ ወቅት ልትረሰው ወአህምየት ኢለህይት።

3. ሐቲ እምር ናይ ሐፍዝ ሳዐት ተህሌ እክ

ምክክ ክል ዶል እግል ሐፍዝ ዱሉይ እግል ልግባኦ ወነአትላምዱ ገአን ምን ገብኤ። እመር ናይ ሐፍዝ ሳታት ለህሌ እን። ክሉ ወቅት ምን ሳዐት ክልኤ ሐቆ አደሐ አሰክ ሐምስ ሐቆ አደሐ እግል ትሕፈዝ በርናምጅ ህለ እክ ምን ገብኤ። ክል



ምዕል ክምሰልህ ሳዐት እት እግል ትሕፈዝ ጀረብ።

ምስል ወቅት ነፍሰን ሰበት ትለምድ። ለሳዐት ዶል ተምም ኖሰ ተአትዘክረን ወእት ሰኩብ ህሊን ምን ገብኤመ እምበል ጀረሰ/አላርም እግል ንቅጽ እንቀድር። እብ ተውሳክ ነፍሰን ለትፈናተ በርናምጃት አው ሐፍዝ አርእሶታት ወሕሰሰ እግል ነአትላምደ ብኩ።

4. ሕዱድ መግጽሕ ህለዮት

እግልሚ ተሐፍዝ ህሊኩ ሚ እግል ተአምር አው ትፍህም ተሐይ ህሊክ አመርት መረ ምህም ተፈ። እምበል መግጽሕ ትቀርእ ሐቆ ህሊክ ምክ እግልሚ መሰለሐት ክም



ቀርእ ህሊክ ሰበት ኢለአምር። ሐር እግል ልትዘክሩ ኢቀድር። ሰበት እሊ ሚ ቀርእ ወሚ እግል ትርከብ ምት ተሐፍዙ ህሊክ አመርት ምህም ተፈ።

እግል መሰል አን የም ለደረሰናሁ ቀዋኒን ኒውቶን ናይ ፊዚክስ እግል አምር ሐፍዝ ህሊኩ ወእሊ ሐቆ ፈሀም። ፈጅር ምደርሰ ዶል ልትሰኢኒ እግል እብለሰ እቀድር። ሸቅል ቤት አው ፈሰል አውመ እት እምተሓን እለ ሰኢል እለ መጽኢት ምን ገብኤ እግል እብለሰ ተፈ። ክእኒ ወዲ ፈዳብ ደረሳይ ወዲ ወእት ምስተቀበልመ እግል ለዐውተኒ

ገአክ ምን ገብኤ ህዩ ክል ዶል አውለውየትክ ድራሱት አው ሐፍዝ ልግባኦ።

እግል ሐፍዝ ወድራሱት አውለውየት ኢተህይብ ገአክ ምን ገብኤ እግል ትትዐወት ኢትሰኢ። እድንዩ ለነሐዝዮም ወአውለውየት ለነህይቦም ሓጃት ቱ ለተህይባኩ። ክሉ ወቅት ሐፍዝ እትለ ትወጅቡ ሳዐት አንበቶት ህዩ። ምክክ ክም ልትቃኔ ወድዩ ወዐውቴን እት መድረሱት ለአትሻፍግ።

6. እበ ለተረደ አርእሰ አንበቶት

እግል ትሸቀዩ ልግባኦ መእግል ትፍህሙ ክቡድ ላቱ አርእሰ አው ሸቅል ቤት። ብዙኡ ወቅት። ተዐብ። ፈተሾት ክትብ ውበዕድ ሰበት ለሐዘ እቡ ምን ነአትብት ሰኢ ተፈ። ብዕድ ክም እሉም ወቅት ለለሐዙ አሸቃል ምክክ ዐሩፍ እት እንቱ። ወወቅት እት ብክ ምን እንወድዮም ለሐይሰ። ምክክ እንዲ ኢልትዕብ ክመ ልትሐይ እግል ንፍህም እንቀድር። ክም እሊ ወዲ እግል ለከብደ ወበዝሐ መጽል እብ ክለ ቅድረትክ እግል ትሸቀዩ ወፍሬ ትርከብ ለአቀድረኩ።

7. ሸቅል ቤት ቀደም ሸቂክ ናይሊ ሐልፈ አርእሶታት ደገም ወርእየት

ሸቅል ቤት ቀደም አንበቶትኩ እግል ለሐለፍካህን አርእሶታት እንዲ ደገምክ ረእየት ሰኢ ተፈ። ሐቲ ለቀለይል አሰኢት እባካ እግል ትብለሰን ለለአቀድር እት ገብኤ። እግል ከቡዳት አሰኢት ህዩ እት አየ አርእሰ ወገጽ ህለየ ሰበት ተአምር አገድ በሊሰን እግል ትርከብ ትቀድር። ሐቆ በሊሰክ ሀብክ እንዲ ደገምክ ቀረኢካህ ምን ገብኤ እግል ትዘክሩ ለህለ በክትመ ህዩ መረ ለዐቤ።

8. ለተሐፍዝ እቲ ወቅት እግል ዓኢለትክ ወመልሂትክ ሐበርት

እግል መተልሂትኩ መሳኒትክ ወእግል ልሕዘውክ ወወቅትክ ልንሰኢ ለቀድሮ አንፋር ምን ቀዳምኩ ምን ሳዐት ክእን አሰክ ክእኒ እግል ሕፈዝ ሰበት ገብኤኩ እግል እተልሂ ይእቀድር (እግል መሰል ኩረት ውበዕድ) ግረ

ሐፍዝዬ ሳዐት ክእኒ ምጽኦ እግል ቲበሉም ትቀድር። እግልሚ እት ፍንጌ ሐፍዝክ መልሂትክ/ኪ እንዲ መጽአው ንተልሂ አው ንትሃጅክ ሐቆ ቤለውክ/ኪ። ምንመ ተአቤ እግሉም ለናይ ሐፍዝ ሸነህትክ እግል ትሕመቅ ትቀድር ወእቦም እት ተሐሰብ ሐፍዝክ ፍገራት ለቡ ኢገብኤ።

ዓይለትካመ ለተሐፍዝ እቲ ወቅት ለአምሮ ገአው ምን ገብኤ። ምን ልኡኩ ካድም ዓኢለት ውብድ እግል ትድሐን ትቀድር። ሰበት እሊ ለተሐፍዝ ወትተልሂ እቲ ወቅት ምን ቀዳምክ እግል ለከሰሶም ጀሃት አሰኢት እት ዐውቴ ደረሰ ዐባይ ተረት በ።

9. ክልዶል እግል ኢትፈሀምክ አሰኢት ምስል ጀግዐትክ እንዲ ገአክ ሸቂ

እትለ ገአ መጽል እግል ትፍህሙ ለከብደ እትክ አሰኢት ምስል ጀግዐትክ ሸቂ ሰኢ ተፈ። ሐቲ ክመ። ረኢሰ ክልኡት ምን ረኢሰ አሮ ለሐይሰ ለለትበህል። ብዕድ ርክን። ርክየት ወመፍሁም ትረከብ። ወወቅትክ እግል ተሐብዲ ትቀድር ለዐለት ሰኢል አገድ በሊሰ ትረከብ እለ። ክም እሊ ወዲ ሐር እት እምተሓንመ እግል ትዘክረ ለአቀድረኩ። ናይ መፋህመት ቅድረትክ ለዐቤ ውብዕድ። ክም እሊ እንዲ ወዲክ እግል ትብለሱ ለኢቀደረክ ሰኢላት ህዩ። ምደርሰክ እግል ትሰኢል እቡ ወጅብ።

10. ሰንበት ንኢሽ ወዐባይ ሐፈዝ

ብዝሓም ደረሰ እግል ሰነብት ክም እግል ዕርፍ ለተሀየቢያም ሰበት ለሐሰብን እት ትልህያታት። ሰፈርያት ውብዕድ ለሓሉፈን። እሊ ላኪን ራቴዕ ኢትን። ናይ ሳምን ዕርፍ ላተን ሰነብት ለደርሰ እምበል አትካራም በደል ለአተላሌ። ወደረሰ ምን ሳምን እት ሳምን እት ልትዕደው። እግል ሐልፈዉ ደርሰ እግል ደገም ተን ለልትሀየቤ። ሰበት እሊ ሰነብት ላዝም እግል ንሕፈዝ እተን ለብኩ። ለናይሊ ሐልፈ ሳምን ለእንደግም ወናይሊ ትመጽኦ ሳምን ደርሰ ለእንታይን እትን አምዕሉታት ክምተን እንዲ ፈሀምን ንክደም።



ምን ጤን ዕልብ ሰቦ ለህል ምስጢር

የሁሉም እግረ ነገረ ዓለም ሳብዓይት ምዕል (ሰንበት ንኢሽ) ብዙሕ ለሐሽመ ወአምዕል ዕርፎም ዋድያማ ቶም። ወእግሉ ሳብዓይት ሰነት፡ ሰነት ሰንበት ንኢሽ ልቡለ ... ወእተ ክምሰልሁ እግሉ 49ይት ሰነት ሰነት ዐረፈ ልቡሉ። ክታብ ደያነት የሁሉ በህለት ተውራት፡ ረቢ አልዓለሚን እግል እዲን እት ሰስ ምዕል እንዴ ክልቀየ እት ሳብዓይት ምዕል ዓረፈ ልብል።

ዲብ እንጂል (ወንጀል) ክታብ ክስታን ህይ፡ ረቢ አልዓለሚን የም አልቅያመ ክታብ አቅዳር እንዴ ፈትሐ እግል ሰቦ ካትም እንዴ ባልሐ፡ ዲብለ አብዋቅ ነፊሕ፡ ወእተ ዶል ልህ ሰቦ ምሲበት ልተራተየ ወእተ ደንጎህን እዲን ተአክትም ልብል።

ፍርቃን ህይ ክታብ እሰላም በህለት ቱ፡ ሰቦ ሰመ ክም ህለየ፡ ወጀሐም በህለት እሳትመ ሰቦ መአቲት ክምቤ ወእት ዘበን ነብየላ የሱፍ መሰር እብ ሰቦ ኪልማም ሰኖታት ክም ሐልፈት፡ ወቐም ዓድ ረቢ ምን አቅደበዉ እግል ሰቦ አምዒላት ውልዋል ህላክ ክም ሰለጠ ዲቦም፡ ወረቢ አልዓለሚን እግል እዲን እት ሰስ ምዕል እንዴ ክልቀየ እት ሳብዓይት ምዕሉ እት ዐርሹ ክም ትከምከመ ውብዕድ ለአሰእለን።

ከእሊ ቅዱስ አክትብት ለቤለየ አንክር እንዴ አጽነሕናሁ፡ ዕልም

ህይ እብ ክሰስ እሊ ዕልብ እሊ ሚ ክም ልብል ዶል እንቃሌዕ፡ ዐጀብ ወፍክር ለለአበይእ እት እንቱ እንረክቡ። ኖር በህለት በርህት እብ ሰቦ ሓባር አዋያፍ ትትከወን። ሙሲቀትመ እብ ሰቦ አውታር ትትከወን። ወለ እት ምግብ ጸሓይ ለትትረከብ ዙረት (ኦቶም) ናይ ናይትሮጂን፡ ዎሮት ኤልክትሮን ምን ዘረት እንዴ ነፍረ ፈግር ዲብ ህሉ፡ ሰቦ ዶል ሰርር፡ እለን ሰቦ ሰረቱ ህይ ሰቦ መዳራት በህለት አርቢት ክም ለህሉ እሉ ትወዴ። ቅብላት እሉም መዳራት እሉም ህይ ሰቦ ምስተዋያት ናይ ጣቀት ልትከለቀ። ወእት ክል ዎሮት ምን እለን ምስተወያት እለን ሕዝመት ናይ በርህት ትትከለቅ። ወእለ ሕዝመት እለ ህይ ዎሮት ጤፍ ምን ናይ ብርሃን ሰቦ አዋያፍ ትገብእ።

ዐልቀትመ እት ክብድ እመ እት እንተ አክል ሕድ መማኒተ እግል ልትመም ገብእ ምን ገብእ፡ ሰቦ ወሬሕ ለአትሐዝዩ። ቀደም ሰቦ ወሬሕ ትወለደት ምን ገብእ ህይ እብ ሐዮተ እግል ትጽነሕ ለትቀድር እብ በክት ሐድ ቱ። ለልትወለድ ጀናመ እት ሳብዓይት ምዕሉ እት ልትሰሚ ጸኔሕና ቱ።

ላመ አምዕሉታትን እት ሳምንታት ካፈልናህን። እሊ ህይ እምበል እትፋቅ ክሉም ሽዑብ እዲን ለልተብዕዎ ንዛም ቱ።

ዕልብ ሰቦ ፍንቱይ ዕልብ ቅስመት ለኢልትከበት ወቅርድ ረበየት ለአለቡ ወናይ ሕሳብ ተሕሊልመ ለኢልትከበት ህቱ ኖሱ ሐቱ ነፍሰ ለቀድረት ናይ ሕሳብ ውሕደት ክምቱ ልትአመር።

ወድ አደሚመ ሰቦ ሓሳስ (ሰመዕ) ክም ቡ ልትአመር፡ ህተን ህይ ሓ'ሰት ሰሚዕ፡ በሰር፡ ጼኑ ተምተሞት፡ ጠምጠሞት፡ ወሓ'ሰት አመሮት ዘበን፡ ወሓ'ሰት አመሮት እት ሐቱ አካን ለህለ ተዋልል በህለት ተን።

መቃድድ ሰጋድመ ሰቦ ገብእ። ዲብ ዕንፊት፡ ዲብ ዘራፍ፡ ዲብ ወድ አደሚ፡ ዲብ ሐት፡ ዲብ ዕዝሎ ውብዕዳም ዶል እንረኤ፡ ምስል ክሉ እሊ ናይ ግዝፍ ወሪም ፍንቲቶም ክሉም ለአስግደቶም አክል ሕድ እብ ሰቦ መቅደድ ለትከወና ቱ።

ከእሊ ክሉ እብ ሱደፍ ለጀረ ቱ ገብእ? ሐቱ ሱድፊት እግል ትጅሬ ትቀድር ገብእ። ምናተ እሊ ክሉ ሱደፍ እሊ እትሊ ዎሮት ዕልብ እብ ከፎ ገብእ ትረከቤ።

እሊ ዕልብ እሊ ናይ ፍንቱይ አቫይር ለቡ ዕልብ ቱ። እሊ ዕልብ እሊ ሰኒ ምህም ወታክያት ናይ ክሉ እሊ ኮን ላቱ ዕልብ ሰበት ቱ፡ ብዙሕ ተፍክር ወአስተንተኖት ለለአትሐሰሴ ዕልብ ቱ።

ዴማት፡ ጀሪደት “አል ነብድ” ዕልብ 8፡ ሰነት 1995

ልብ

ኩባየት ማይ

ዲብ አሮት ድን ጀሐር ወፈለል ትከለቀ ልትበህል። ሐር ሹም ለዐድ ለፈለል ወለ ጀሐር እግል ልጋብህ እት ወድዩ ለዐለ ጀርቤታት፡ ምን ሰካን ግውኑይ ላቱ ጠለብ ጠልቤ። ከእተ ምግብለ ድን ግድር ዐቢ እግል ልክሬ ክም ቱ፡ ወለ ገብእ እናስ ልግበእ መእሲት ዲብለ ግድር ኩባየት ሐሊብ እግል ልብለስ ክም ብእቱ፡ ክም ሸርዋ ላኪን፡ አሮትክ ኩባየትላ ሐሊብ እትላ ግድር እግል ልብለስ መጽእ ዲብ ህለ እብ በይኑ እግል ልምጸእ ወአሮት እንዴ ኢልርእዩ እግል ልብለስ ክም ብእቱ አመረዮም።

ለአዳም ጠለብለ ሹመ እግል ለአውሬ ትባደረ ወትሳሰዕ። ወአሮቶም ተ ከላሊ እት ልትሐበዕ እንዴ መጽእ አሮት እንዴ ኢልርእዩ ለኩባየቱ ዲብለ ግድር በልሱ።

ምድር ክም ጸብሐ ለሹም ለግድር ዶል ፈትሐ ሚ ገብእ ረኣ መስለኩም? ለግድር ምን ማይ እንዴ ትመለኣ ጸንሐዩ! ለሐሊብ ህይ አየ ገብእ ረትዐ?!

ወእብ ሚ ሰብብቱ ገብእ ክል ዎሮት ምን ሱካን በደል ኩባየት ሐሊብ ኩባየት ማይ እግል ልብለስ ለትቀሰበ?

ዎሮቶም ተ ከክም እሊ እት ልብል ሐሰቤ።

ዲብ እሊ ክሉ ሐላይብ ለሰብለ ዐድ ባልሱ፡ ኣነ ሐቱ ኩባየት ማይ ምን እበልስ ሐቱመ ተእሲር ኢትወዴ ቤለ።

ዎሮቶም ተ ከለጸፍ እግል ብዕዳም ጸዕነዩ። ዎሮቶም ተ ከእብለ መለሀዩ ለብዕድ ለሐሰበ እበ ገበይ እበ ሐሰቤ። ወህቱ እብ በይኑ ሌጣቱ ለማይ ዲብለ ሐሊብ በልስ ለህለ መስለዩ። ከክም ነቲጀት ናይ ለዐመሎም ለድን ፈለል ሰበት አድመዐዩ ለትትሐዜ ዐለት ሻፍገት ራድኢት ሰበት ኢትረከበት ብዙሕ አዳም ትደበረ ወትማየተ።

ከእንታመ እት ወቅትላ መሰደድ፡ ለኩባየት ሐሊብ እግል ትምለኣ እት ልትጠለብ እቱ ምንክ ወቅት ማይ ትመልኣ ክም ህሌክ ተአምን ሚ ኢፋልክ?

እግል መሰል፡ ለትትህየበክ መሀመት እብ ገበይ ብሸልት በደል ተአተምመ እት ቀበት እሉም ብዝሓም እብ አየ እግል እትአመር እንዴ ትቤ እዕትማድክ ክሉ ዲብ ብዕዳም እትላ ትወዴ ዲብ አውቃት፡ እንተ እት ወቅት ለህይ ለኩባየት እብ ማይ ትመለኣ ህሌክ።

እንተ ኖስክ ለእለ ትወዴ ሰንዐት እብ ንየት ሳፍየት በደል ትከድመ ለብዕዳም ክሉም እብ ንየት ሳፍየት ከድሞ ሰበት ህለው እለ ናይ ተእሲር ኢትወዴ ዶል ትብል፡ እንተ ለኩባየት እብ ማይ ትመለኣ ህሌክ።

እግል ድቡራም እግል ተህቡ ለወጀበክ ማል ብዕዳም ለህዩባም ህለው እንዴ ትቤ ከለናይክ ዶል ትጠማዕ ምናም እንተ ለኩባየት ማይ ትመለኣ ህሌክ።

ወቅትክ እት ዕልም ወድራሰት ወለነፍዕ ጋራት በደል ተአስተፊድ ምን በላሽ ዶል ተአበድዩ እንተ ለኩባየት ማይ ሌጠ ትመለኣ ህሌክ።

ከዐቦት ሙጅተመዕ ዲብ ተረት አፍራድ ሰበት ተአተንክብ፡ ለገብእ ነፈር ዋጅቡ እብ ብሸልት ገበይ እት ብዕዳም እንዴ ኢልጽዕኑ፡ እብ ተአስታህል እግል ልቅነጽ እብ ለአትሐዜ። ወእለ ለትመሰል ፈዛዐት ለመልኮ አፍራድ ለበዝሐ እቱ ሙጅተመዕ ምን አሴራር ገጽ ቀደም ለትከርዑ ሐቱመ አለቡ። ከጀላብ ዐቦት ወዐማር ዐድነ ዎሮትክ ለክባየቱ ሐሊብ ሌጠ ልዕሌ ዲብ ክልብለሱ።



በህል

- ፈዳብ ሸቂ ወሐምቅ ልሰኢ።
- አምር ወሐለት ወድ አደሚ ክልኦት ገጽ ናይ ሐቱ ሰንዐት ተን።
- ሐሊት እሲት እት ግርመታተ ወግርመት እናስ ህይ ዲብ ሐሊቱ ተ።
- ፍቱሕ እግል አደቀቦት ሐሊት ሐቆ ትትሰኣን፡ እሊ ፍቱሕ እግል ልትደቀብ ምስምሰ ገብእ።
- ሐቅ ሐዞት ሐሊት ሐቆ ገብእ፡ ምን ሕምቅን ዶል ትድሐን ልባብ ቱ።
- እዲን እግል እወስክ አውመ እግል አንቅሰ አሰክመ ኢቀደርኩ፡ በዐል ሐሊት ኣነ እንዴ እቤ እግል እትፋውሽ ኢወጀብኒ።
- ለውቀት ዲብ ማል፡ ሐሊት፡ አውመ ሰልጠት ኢኮን ለትትረከብ። ለውቀት ዲብለ ሕነ ሐሊት ወማል ወሰልጠት እት ሚ ክም ንትነፈዕ እበን ቱ ለትትረከብ።
- ተከዩ ሐሊት ዲብ እለ እዲን ክልኤ ተን፡ ህተን ህይ ሰይፍ ወቀለም ተን። ሰይፍ እግል ዶሉ ገብእ እት ህለ ቀለም ላተ እግል ክል ዶል ቱ። ሰይፍ ምስል ወቅት መአበይ ገብእ ወሰርገልመ አለቡ፡ ምናተ ቀለም ላተ አክለ ወቅት ሐልፋተ ከሰርጉል ወመፈተይ ገብእ።
- ለገብእት ትግበእ ሐሊት ዴማተ ልብ ሐቆ ኢትገብእ ሐምቀት ሌጠ ተ።
- መተንኮብ እት ብዕዳም ሕምቅና ቱ፡ መተንኮብ እት ኖስ ሐሊት ቱ፡ እት ሕድ ለትወደዩ መተንኮብ ህይ ርሽመትላ ሐሊት ቱ።
- እንተ ለትትሸነህ እግል ትርከብ እግል እለ እዲን ሸሩዋክ እግል ትክሬ እለ ሐሊት ሐቆ አለብኩ፡ ብዕዳም ለከረዉ እግልክ ሸሩዋ እግል ተአትምም ብእትክ እንዴኢኮን ካልእ ሐራን ኣለብኩ።

ተበሰም



ጨበል ድራፋ

ነፈር ሰኒ ህኩይ ዐለ። እሊቱ እግል ተአትቃዴ ሱግ ጌሰት። ሱግ እት ትገይስ መፍቱሕ ለቤት ትረሰዐቱ። ከዶለ እቅባለተ እግል ልፍቶሐ እለ ለባብ ከርከሐት ዲቦም። ለወልዱ እንዴ ነቅመ “ቅነጽ ለባብ ፍትሐ” ቤለዩ። ህኩላ ጀናመ ምንተሐት ህኩት አቡሁ ሰበት ይዐለት “አቤኮ!” ቤለ ወእተ ምትክራሩ ትባለሱ። ለወለቱ ነቅመ ክፍትሕዩ ቤለዩ። ህታመ አቤት እሉ። ማን ወገለብ ትዋለበ። እት ደንጎበ ምን ምትክራሩ እንዴ ኢቀንጽ እግል እሊቱ። “የህይ ወለት ሰብ ሕድግት ህሌኪ” ዐድኪ ጌሲ ቤለየ ንብለኩም። ከረቢ ልነጃኩም። ህኩት ለአክ ሕማም ተ፡ በዲርመ “ህኩይ ሐርኡ እብ ፍሸይ ለአክልሱ” ቤለው ማሚ ሰብ መሰል።

ዝበደ ዘዖታት

- ሰለስ ጋሪት ሐር ለኢለአቀብለ...
- ሂጋ - በክት - ወወቅት
- ሰለስ ሰንዐት እግል ትርከበን ኣኪደት ለአለበን፡
- ሕልም - ዓውቱ - ተጃረት
- ሰለስ ጋሪት አዳም ሕሹም ለወድያክ
- ለኢትትሐለል ክድመት - እክላስ - አደብ ሰኒ
- ሰለስ እብ ዐውል ለኢልተመነ ጋራት
- ፈተ - ሐሸሞት ነፍስ - መሳኒት
- ሰለስ ጋሪት እግል ወድ አደሚ ገጽ ሐር ለበልላሁ መግህፍ - ምክሔ - ወሐሩቀት እብ ቀሊል ጋራት

እት ዋሽንግተን ዲሲ - አሜሪካ ለነብር አማኑኤል ብኢዲሚርያም ለልትባህል ኤሪትርያይ እለ “ንዳልን ረዩም ወወውቲን አኪድቲ!” ለትብል ስቅራት፡ አርእስ ናይ ክታቡ ዋዲህ ሀለ። እሊ መዋዋን እሊ እት መሕበራይ መትራክቢ (ሶሻል ሚዲያ) ክሉ ለእግል ሽውሆት፡ አርዐዶት ወአቅወዮት ሽዑብ ወሕኩመት ኤሪትርያ ለልትንሽር ሕሰይ እት ዋጅሆት ለሸቄቲ። ሽዑብ ሐብሬ ራትዐት እግል ልርኩብ ወለሕሰይ ሀደፉ ሚ ክምቲ እንዴ አመረ እግል ልፍድሑ ዲብ አፍዝሆት ወሐበሮት ሽዐቡ ሐድ ሐሉ ልትጻገም። እግል ኤሪትርያ እንዴ ኢልርእወ እግለ ዲብ መሕበራይ መትራክቢ ለልትንሽር ሐብሬ እንዴ አምነው ለበዱ ሀዩ፡ ሐብሬ ራትዐት እግል ትብጽሖም ክቲብ ብዙሕ ለአዳሌ ።

እሊ እግል ዋጅሆት ሕሰይ ወአፍገሮት አማን ለጀምዐዩ ለትፈናተ ወሳይቅ ወደላይል ክም ተአከብ እት አክትባት እግል ልከምክሙ አንብተ። አሰይድ አማኑኤል ክልኦት ክታብ ጠብዐ። ለአወላይ ክታብ ዲብ አሜሪካ ልትደሐር እት ሀለ አርእሱ “The History of The USA in Eritrea” በህለት “ተእሪክ አሜሪካ ዲብ ኤሪትርያ” ለልብልቲ። ለካልኦይ ክታብ ሀዩ “Eritrea THE STRUGGLE IS LONG AND VICTORY IS CERTAIN” ልብል። እሊ ክታብ እሊ እት ዮም 5ኣፕሪል 2025 ዲብ ሆቴል አሰመረ ፓላስ አድሐረዩ።

እንግሊዝ እብ ግኒ ለትሸቀ እቲ ሀደፍ ክምቲ አመርኩ። አሜሪካ እት በሐር ቀዩሕ ለተሐሰረት ምን ረበርብ ካልእ ሐርብ ዐለም እብ ትርድት ሐሊተ ክም ፈግረት እት አፍሪቀ ምክራይ እግር እግል ትርኩብ ዶል አንቀደት ቲ። ምራደ እግል ትብጽሕ ለተአምኑ ልኦክ እግል ትጽባባ እብ ዐለ እለ ምራድ እት ኦቶብዩ ዕንተ ከፊት። እስትዕማር እንግሊዝ ሀዩ መትምማይ ምራደ ገብአ። ኤሪትርያ ሰቀለት ኦቶብዩ እግል ሊደዩ ተዐንደቀ። እለ እግል ለአሰብት ወደዮ እተ ዐለ ከይናት፡ ሽዑብን እብ ኦቶብዩን እግል ልትፈጠቅ ሐዘ። ለዐለ መሳኔዕ ገሌ እግል ኦቶብዩ ክም ጠቀረዩ ወገሌመ እት ሐንቲ እስትዕማሩ ለዐለዩ ድወል ክም አዝበዩ፡ ሽቅል ተሐገለ። መንበሮ ቀሌት፡ በዳዩዕ እብ ዐስሮታት ዕጹፋት ወሰከ። ሰብ ምህነት ልግቡእ ውበዕዳም ሽቃለ መሳኔዕ አሰክ ኦቶብዩ ለጅአው፡ መቃብሉ ምን ኦቶብዩ አሰክ ኤሪትርያ ለለኦቲ በዝሐው። ለሐብሬ እለ ጀምዐኩ ምን ማዳት እንዴ ሐልፈት እት ክታብ በጽሐት ወተእሪክ አሜሪካ ዲብ ኤሪትርያ ለልብል ክታብ እብል ትጠበዐ።

አሰይድ አማኑኤል እት መናሰቡለ መድሐራት ክታብ ህግያሁ እብ ክእነ አተላላዩ፦
ለስትራቴጂያይ መካሪትን ዕንታት ዳቅባም ክም ትከረ እቲ ምድርን ወበሐርን ህቶም እግል ልብሐቲ ደሀስ እግል ሊደዉነ ዐለት እሎም።

ሕዩል ምፍጋር ወምውዳቅ ላኪን እሊ ሰሙድ እሊ እግል ልብይኦም ኢቀድረ። ተእሪክነ ክል ምሮ እብ እግሉ ተሐይሰ ከትቡ ወዳግሙ ድኢኮን እግልን አክልሕድ ለሽረሐነ ተእሪክ ኢወሰቀው እነ። ተእሪክ ሀዩ በዐሉ ኢመልከዩ ምንገብእ ምሮክ አሰክ ሀደፉቲ ለዋልዩ።

መንጠቀትን ወደኅ ሐርብ ወቅታልተ። ባብ በሐርን አባይ ወፈታይ ለለኦቲ እቡ ምስል ለትፈናተ ገባይል፡ አድያን፡ ዓዳት ወሰቃፈት እግል ንትሓበር፡ እቡ እንዴ ትፈጠቅን እግል ኢንብዴ እት ዓዳትን ወሀውየትን እግል ንሓፍዝ ለመንበረትን ኖሰ ዐለመተኑ። ከእቡቲ ሰሙድ፡ ከህላት፡ ባሳር፡ ኖሰክ እንዴ ትረሰዕክ ጀለ ለበዝሐ አዳምክ መትሰባል ነባሪን ወእሱልን ለገብአ። እስትዕማር ዋልያን እት ሐቲ ደውለት ክም ሐዩቤናመ እት ክል ቀቢለት ለጸንሐ ቅዩም እት ደረጀት ወጠን ትጠወረ። ዋልያን ዶል ትፈለለ ክም አመትን እስትቅላል ዲብ ለአሰትህለን ክም ትከለእነናሁ፡ ሰልፍ እብ ሲያሰት ወሐር እብ ስለሕ፡ እት ስለሕመ ሰልፍ እብ ጀብህት ተሕሪር ኤሪትርያ ወሐር እብ ጀብህት ሽዕብዩት ተሕሪር ኤሪትርያ እስትቅላልን ለረከብኩ፡ ለሓር እት ረአሰለ ቃሊ ቅዩም ቀዳም እት ልትንደቅ ምን መጽኦቲ።

ወጠን ምን ሰውረት እት ደውለት መብተቅለት ለአብጸሐ ርኢሰ



ኢበዴ አሚን፡ ምርሐት ሽዑብ እሉ እንዴ መሰልክ እት ሰፍ ቀደም እንዴ ገብአክ ወጀሆት ክምቲ እብ ዐመል ለእርእ ሚርሓይ ምን ገብኦ፡ እት ዐለም ፍንቲይ ወድዩ። ክሉም ማርሐት ኤሪትርያ እለ ወዴን ወእለ ፈዐልን እዴ ኢልብሎ እለ ወጠን ከአፎ ትትሐረር፡ እብ ሲያደተ ትነብር፡ ትትዐመር ወትጠወር እንዴ ልብሎ ለተሩህ ምን ገብአው፡ እት ዐለም ፍንቲያም ሚርሐት ወድዮም። እሊ ክሉ ላኪን እብ ወሳኤል እዕላም ዲብ እዴሆም ለሀለ ድቁባም ወጽጉባም እግል ልትአመር ወሲራቲ እግል ትረፈዕ ኢልትሐዘ። ለህቶም እብ ድዱ ልቡሉ ሀዩ ደለ ደርሰ ወእት ብሐሳት እትበገሰ ሀሌኮ ቤል፡ እግሉ ሰበት ልትማጤ ለአማን ድፍንት እግል ትንበር ትቀሰበት። ለሐዳም እግል አማን ለልሐንፍሎ ሀዩ መጃል ክም ኢረክቦ እግል ሊደዩ ሐሊት ወደቅብ ብእተን ለጸጉባት። ከእለ ምን እግል ንትባለሕ ኤሪትርያን ተእሪኩም ኖሶም እብ ሐቂቀቲ እግል ልክቶቡ ብእቶም።


አዳላይ ክታብ ቀሊል ኢኮን ውቀት ብዝሕት፡ ሰብር ውብሐሰ ቀሪ ለሐዘ፡ ላኪን እግል ንትበገሰ ዲቡ ብኩ፡ እለ ኢወዴን ምንገብእ ብዕዳም ልክቶቡ ነሐድጎም ሀሌን ወህቶም ለክቲቡ እን እግል ልሸረሐነ ኢቀድር። ክል ምሮ እብ እሉ ለሐዘ ሀለ ቀረድ ሰበት ከትቡ ገሌ ሕሰይቲ፡ ገሌ ሽንኩይቲ ወገሌመ ቂመት ለለሀትክቲ።

ኣነ እብ ቅድረጅ ለኤሪትርያ ሐልፈት እብ ክርበት፡ ክልኦት ዳቅባም እድንዩ አሜሪካ ወእትሓድ ሱሽዩት እምበል ምሮ ሴድያይ እግል አባይ እብ ጽዋሩ እት ልሓሩቡ ሽዐብ ወሰውረተ እት ዐድ ወካርጅ ለአርአዉ ሰሙድ፡ መተንካብ እት ኖሴ፡ እንድባዋ፡ ምህዜ፡ እትሊ ክታብ እግል እከምክሙ ጅሩብ ሀሌኩ። እሊ ክታብዩ እት ክል ጃምዐት ወእት

ክል መድረሰት እግል ለሀሌ ሰበት ሐዘ ክልን እግል ንሳዴ ሰእየትቼተ። ክልን ሀዩ ተእሪክነ ኖሰን እግል ንሓኪ እብል ትፈናተ ሽክል ፈን፡ አክትባት፡ አፍላም፡ ሐልዩት፡ ረሰም . . . እግል ንትብገሰ፡ እብ ሐብሬ ወምክር አድሕድ እግል ንስዴ፡ ለሰብል ወቀይ ሀዩ ተእሪኩም እግል ልሓኩ፡ እግል ልክቶቡ አው ለአተክቲቡ ብእቶም። ለፈርያትን እት መትነፈዳይ እግል ልብጸሕ ሀዩ ለለእሸቄን ሽክል እግል ንባሰር ብኩ።

ክቲብን ወናይ ፈን ፈርያትን ሀዩ እብ ሀገጊ ዐድነ ሌጠ እግል ልግበእ አለቡ፡ እብ እንግሊዚ ውበዕድ ሀገጊመ እግል ልትከተብ ብእቲ። ለእብ ብዕድ ሀገጊ ትከተብ ሀዩ እት ህግዩ ዐድነ ክም ልተርጀም እግል ኒዴ ብኩ። ክታብ ‘ንዳልን ረዩም ወወውቲን ኪድቲ’ ዲብ ትግርኻ እግል ልተርጀምቲ፡ ምኑ ለልትረከብ እተይ ሀዩ እግል ምሕርበት ምስኩናም እግል እትበርዑቲ። እግልሚ፡ ለእት ሐንቲ አርደትን ሕቁፋም ለሀለው ሹሀደ ወእብ ሰርሰር ገርዖም እት ክድመት ወጠኖም ለሀለው ምስኩናም ሰብ ወጠን ወሐበን እግል ንግበእ ለወደዉነ ህቶም ቶም። ህቶም ዲመ ካብራም ቶም፡ ፈኮም እብ ነዕፊቡ አለብኩ፡ ልብን ምስሎም ክምቲ እግል አርኤ ሌጣቲ እለ እወዴ ለሀሌኩ። እትለ ሓድራም ለሀለው ዲፕሎማሲያንመ ለክታብ እንዴ ትዛበዉ እብ ክሰሳ ኤሪትርያ ለልትንሽር ሐብሬ አክልሚ ሕሰይ ለበዝሐ እቲ ክምቲ እግል ለአትዋይኖ ወለአማን እት ጸርም ክም ትበጽሕ እግል ሊደው ሰድዮም ለልብል ረኣይ ብዩ።


እተ ክታብ ረኣዮም ለሀበው ናይ እጅትማዕያይ መትራክቢ መልሂቲ ወሰብ አምሩ፡ ለክታብ እብ ክሰሳ ኤሪትርያ እግል ልኦምር እግል ለሐዘ ብዙሕ ለነፊዕ ሐብሬ ሓቅፍ ክም ሀለ ሽህደው እሉ።



ለእብ ዶልዶሉ እት መሕበራይ መትራክቢ ነሽሩ ለዐለ ክቲቡ ዲብ አክትባት እግል ለአርኩ ለሐረ እቡ ዲብ ሽፊሕ ልብል፡ “ ኤሪትርያን እግልሚ እት ክለ እድንዩ እግል ልልጅኡ ትቀሰበው እንዴ እቤ ክም ሐሰብኩ ወመዕሉማት ፈተሽኩ፡ ዐድነ እግል ንፍገር ለትቀሰብን ምን መትፈላል ዋልያን ወኢተት

እብሊ ሀደፎም እግል ልትዐውቶ ሀዩ ዓዳትን፡ ህግያን ቅዩምን ክም ልትበለል ሸቀው። ሽዑብ ኤሪትርያ ላኪን ሽዑብ ዐጂብቲ። እግል ክሉ እብ ከህላት፡ ሰብር፡ ኤማን ወሐጠር እንዴ ባገረዩ ሀውየቲ እንዴ ኢለአበዴ ዲብ ሕርየት በጽሐ። መቃብል ክሉ እብ ዲን ወቀባይል እግል ልትሸተት ለተሐበክ እሉ ከይናት ውሕደቲ እንዴ አተረደ እብ ዐውቲ ፈግረ።

ኢሲያስ አፈወርቂ እግል መናካል ሚ ኢትብህለ። ህቲ ላኪን ምስል ጸሩ፡ 60 ሰነት ምን ሀደፉ ሐቲ ዮም እንዴ ኢሸክፍ እግል ሐቅ ተቅሪር መሰር፡ እግል ፍቴሕ ወዐዳለት፡ እግል ዐማር ወሰያደት ናደሎቲ ምን ጸንሐዩ አጅያል ለወርሰዩ ወእት ሓርያም ለዐድዩ ለሀለ ምሕርባይቲ። ርሕክ አሚን ወእት ኖሰክ መተንካብ፡ ሰእየት እንዴ ኢትብትክ ሐቅ ክም



ቀጽሂል መደርቢን ኩረት ሹልቦል ቀህየቦ



ከረን ትልህዩ ካስ ሕርየት ለአተላሌ ህለ

ለሐልፈት ሳምን ለአሰብደ ትልህዩ ካስ ሕርየት መዲነት ከረን ሰንበት ንኢሽ ወሰንበት ዐባይ እብ ሰለስ ትልህዩ ዲብ ስታድዩም ከረን አተላሊ።

ሰንበት ንኢሽ ናይ አዋልድ አንሳት እዳረት ዳሕየት 06 እዳረት ደሕየት 01 እንዴ ተልህዩ። ትልህዩ 11 ደቂቅ ክም ጌሰ ምኑ መተልህዩ እዳረት ዳሕየት 01 ንስሪን አሕመድ ጎል ሰጀለት።

እግል ዕርፍ እብለ ነቲጀት ለትፈናተየ ዲብ ካልኣይ ናይ

ትልህዩ ወክድ እዳረት ዳሕየት 06 ለትሳውዩ ጎል ምን ናህላእ ዑመር ረክበት። ሐቆ እለ ጎል እለ ለሐሶስ ፈሪቅ 06 አሰክ 54 ደቂቅ ሰለስ ጎል እንዴ ወሰከ 4 እብ 1 ተዐወተ።

እብ እንክር ውላድ አልጋሽ ወአልሂላል ተልሀው። ቀደም ዕርፍ ጎል ለኢትረኣ እቱ ትልህዩ ፡ዲብ ካልኣይ ደውረት ላኪን ፈሪቅ አልሂላል ዲብ 81 ደቂቀት ምን ናህ ብርሃኔ እብ ለረክበየ ጎል 1 እብ 0 ዲብ ለተሌ ትልህዩ ሐልፈ።

ዮም ሰንበት ህዬ እግል ለሳሌ ወሳሕል ለአትራክበት አምዕል ዐለት። እለ ትልህዩ እብ መተልህዩት ሳሕል ሰኒ ትልህዩ ለትረኣ እቱ ምንመ ዐለ ጎል ላኪን ኢትሰጀለ ዲብ። ዕዉት ፈሪቅ እግል ፈንተዮት ህዬ ዲብ ሪገሌ በጽሐ። ሳሕል 4 እብ 1 ዲብ መጽእ ትልህዩ ሐልፈ።

ትልህዩ ካስ ሕርየት ለትመጽእ ሳምን አልነሰር ምስል አልሂላል፡ ዐንሰበ ምስል ሳሕል እብ ለወድዉ ትልህዩ እግል ለአተላሌ ክምቱ ወኪል ወካለት አክባር አቅሊም ዐንሰበ ሐበረ።

ደዋር ካስ አቅሊም ምግብ ብድረ ዐጀላት 2025

5 አፕሪል እት ባካት ሞኖፖልዮ እብ ገብኣት አወላይት መርሐለት አምበተ። ዲብ ስጋደት ማይ ጀሕጀሕ እት ገብኣት ብድረ ክልኤ ንቅጠት ለከምከመ ብድረ፡ እንተርሚደይት ዐለ ዲብ አዋልድ አንሳት 65.5 ኪሎሜተር፡ ብርክቲ ፍሰሃዬ ምን አራግ አወላይት፡ ሮምን ጉዑሽ እብ ሾላተ አወላይት ፈግረት። ምን ፈሪቅ ግብለት ነፈር ፈሪቅ ግብለት ናርዶስ ጸጋይ ህዬ ሳልሳይት ፈግረት። እለን መትባድረት ዲብ ሳዐት 34.6 ኪሎሜተር ዲብ ልሰዕዮ፡ እት ሐቲ ሳዐት ወ54 ደቂቀት ወ8 ሳንዩት ጅግራህን አትመመየ።

እምበል እለ ዲብ ክልኢቱ እንተርሚደይት ደረጀት አወል ለጸብጠት ብርክቲ እብ ንቀዋ ኪሉል እብ 17 ንቅጠት ትመሬሕ ህሌት። አሰር ብርክቲ ሮምን እብ 10 ንቅጠት ወናርዶስ እብ 8

ንቅጠት ተልያህ ህለዮ። ዐባዩ ውላድ ተብዕን ምን ፈሪቅ አሰቤት ሚልክዶስ ሚካኤል አሮብ ሐቀለ ጌሎ፡ አወላይት ጅግራህ ወደ። 109.8 ኪሎሜተር ህዬ ገልበበ። መትባድራይ ሰምበል ሄብሮን ብርሃኔ ህዬ እብ ሾላተ ተዐወተ። እብ 2 ሳዐት ወ28 ደቂቀት ወ52 ሳንዩት ዕዉት አወላይት መርሐለት ገብኣ። ናታን መድሃኔ ምን አሰቤት ወህያብ ሀብቶም ምን ኤራቴል ካልኣይ ወሳልሳይ አተው።

ዲብ ካልኣይት ኢንተርሚደይት ለተዐወተ ሄብሮን፡ እተ ናይ ንቀዋ ጅግረ እብ 14 መርሕ ህለ። ናታን እብ 9 ወህያብ እብ 8 ተሉዉ ህለው።

እለን ክልኤ ዲቪዥናት ማሌ ለሀ አትኒን ካልኣይት መርሐለት እግል ለአትምሞ ብድረ ከደን

ወደው። አዋልድ አንሳት ምን ብሎት ጎዳይፍ እንዴ ትበገሰዮ፡ ሰንይቲ እንዴ በጽሐዮ፡ 112.7 ኪሎሜተር ሰዐዮ። ትልህዩህን ህዬ ብርድት ክም ዐለት እብ ገልበበያህ ወክድ እግል ትፍህም ቀድር። ዲብ ሳዐት 29.5 ኪሎሜተር ኪደዮ። ሰንበት እብ መትባድራይት አራግ ብርክቲ ለትፈለለት ሮምን ህዬ፡ እብ 3 ሳዐት 49 ደቂቀት ወ1 ሳንዩት እግል መትባድራይት አራግ ሞናሊዘ አርአዩ እንዴ ሐልፈት ተዐወተት። ሰዛን ፍሰሃዬ ምን ግብለት ሳልሳይት አቲት። እብለ ነቲጀት እለ እብ ወቅት ብርክቲ 5 ሳዐት 42 ደቂቀት፡ 45 ሳንዩት ትመርሕ ህሌት። ሮምን 3 ሳንዩት ሞናሊዘ 16 ሳንዩት እንዴ ደንገረየ ተልያህ ህለዮ። ብርክቲ ማሌ ለሃመ ዲብ ክልኡት እት ፍንጌ ለትረብ ሾላተ ዲብ ምን ተወዐወተት፡ ንቀጠ ዲብ 24

አስመረ፡ ሳምን ርያደት ወግዳት ደረሰ ተመ

እት አቅሊም ምግብ መክተብ ተዕሊም ግብላታይ ምፍጋር-ጸሓይ አስመረ ለትዝመት ወእግል ዝያድ 6 ወርሕ ለአተላሌት ሳምን ርያደት ወግዳት ደረሰ ዮም 6 አብሪል እት መድረሰት ሕጁባም አብርሃ ባህታ ዲብ ገብኣት መናሰበት ተመት።

እተ ሳምን ዝያድ 22 አልፍ ደረሰ መኣንብታይት ወምግቢይት ደረጀት ክም ሻረከው ለሐበረ መስኡለ መክተብ መምህር አብርሃላይ አረፈይ። መቅደረት ጅግረ ለፈትሽ በራምጅ ክም ዐለ ሐበረ።

እት ደንገበ ምን 1ይት አሰክ 3ይት ደረጀት ለፈግርው ደረሰ መዳልያት ክምሰልሁመ ታብሌታት ወምባይላት ክም ተህየበው ሐበረ።

ለመናሰበት ደረሰ መድረሰት ሕጁባም አብርሀ ባህተ እብ ቀደመም ዕፌ ዓዳት ወርያደት ናይረት ዐለት።

ውቅልቲ እንዴ ወቀለቲ መሬሕ ህሌት። ሮምን እብ 18 ናርዶስ እብ 10 ተልያህ ህለዮ።

ልትባደር ለህለ ሳይሞን ሚካኤል፡ እብ ነስኣዩ መባደረት ሐድ 130 ኪሎሜተር እብ በይኑ ተህርበበ።

ለሐልፈት ሰነት፡ ዓመት ለዐለት ዮም ዓመት ላኪን ዲብ መርሐለት እግል ትትዐወት ለኢቀድረት አድያም ዳዊት፡ ምን ደንደን ማሌ ለሀ ለዐለት እሌ፡ ሐት ሐቲ ንቅጠት ለትከሰበ ስጋይድ ዲብ ምን ተዐወተት እብ 2 ንቅጠት ትመሬሕ ህሌት።

ሳይሞን ዲብ አፈልበ ናይ ሐቲ ዲብ ክሳድ መኸረም ሐምስ ንቅጠት ለለኣክሱስ ስጋይድ ዲብ ልትዐወት እት ህለ፡ ዲብ ድግሰማ ካልኣይ እንዴ አተ ሐቲ ንቅጠት ረክበ።

አራግ ደንደን ፈሪቅ ግብለት እብ 17 ሳዐት 9 ደቂቀት ወ27 ሳንዩት እብ ደረጀት ፈሪቅ ምን አወላይ አሰክ ሳልሳይ ርቱባት ህለዮ።

እብለ ህዬ እት ጅግረ ስጋይድ መርሕ ህለ። ነፈር ደንደን ዳንኤል ይሕደጎ ወናይ ብሕተ መትባድራይ ሚሮን ግርማይ እብ 3 ንቅጠት ተለዉ ህለው።

ውላድ ተብዕንመ ምን ጎዳይፍ እንዴ ትበገሰው፡ ከዞን ሐዋጹ እንዴ በጽሐው አቅበለው 183.8 ኪሎሜተር ገልበበው። ለትፈናተ ህጁማት ህዬ ትረኣ። እብ ፍንቱይ እብ ብሕተ

እትለ ጅግረ አክሊሉ አተሽም እብ 5 ሳዐት ወ20 ደቂቀት ወ50 ሳንዩት ተዐወተ። እብ ፈሪቅ ህዬ ደንደን እብ 23 ሳዐት 29 ደቂቀት ወ18 ሳንዩት መሬሕ ህለ። ኤራቴል ወግብለት ህዬ ግራሁ ህለዮ።



እርክቲክ ናይ በራደት መቅደረት እብ 25% ከም ነቅሶ ተአመረ



እብ በሕሲን ጃምቦት ሚሺጋን ለጉብአ ድራሳት ምን ሰነት 1980ታት ወሐር መቅደረት ብርደት አቅሊም አርክቲክ እብ 25% እግል ልንቀስ እብ ቅድረቱ መደረት ዐለምን ኖስ ናይ ብርደት እብ 15% ክም ደህረዩ ሐበረው።

እሊ. እብ ሰዓይት ሳትላይት
ለጉበኣ ድራሳት መቅደረት
በራደት ኦርክቲክ እብ ሰብብ ነቂስ
ቅያስ በረድ እተ ኦቅሊም ክምቲ፡
ወእሊ. ሱዱፍ ለህላ መትደሃር

ናይ በራደት መቅደረት አርክቴክ
እተ አቅሊም ሑድ በረድ ክም
ለህሌ ሰቡት ወዴ ዲብ ወሰኑት
ናይ እዲነ ሐፋነት ክም ለአበጽሕ
ለበሕሲን ሽርሐው።

አርክቲክ ውቁል ላኪን እብ ሀዳአት ለገይሰ መኪክ በረድ ክም ልትርኢ እቱ፡ ምናተ ዲብ ሰነት 2016 ለሳደፈ ውቁል መኪክ በረድ ለአቅሊም እብ ኖሱ ናይ በራደት መቅደሪቱ ክም ደሀረ ለሐብሮ። እት አርክቲክ ለህለ

በረድ እምበለ ሳድፉ ለህላ ሻፍግ መኪኩ፣ ለታርፍ ለህላ በረድመ እብ ሰብብለ እተ መንጠቀት ሳድፍ ለህላ ሐፋነት ወዘላይም እግል ልርቀቅ ወበርሀት ጸሐይ ናይ ዳፍዖት መቅደረቱ እግል ትድዐፍ ክም ቀድረት ለበሕሊን አሸረው። እብሊ አሰባብ አርክቲክ ዲብ እሊ መጽእ ቅሩብ ሰዮታት በረድ ለአለቡ አቅሊም እግል ልግበእ ለህላ ተቅዩም ውቁል ክምቲ ሸርሐው።

**ጠክረኤ ጅንደራዊ ሕግ
ዓረፍት ሰነድ**

እት ጃምቦት ካምብሪጅ ዲብ ለገብአ ድራሳት ጠልፌሕ ጅንሰ ፋጆሊ ዲቡ ለልትረከብ ፕሮቲን፡ ገለፍ ወኪማኢያት ዲብ ሐሰሞት ሓላት 0ቅል ለልትሐመድ ሸዑር ርኩብ ምኑ ካም ህለ ተአመራ።

ጠልፈራሐ ጅንባ ፋጆሊ አሳሱ መንጠቀት ምግባይ ምፍጋር ጸሓይ እት ገብእ። እትሊ ወክድ እሊ እት ክለ እዲነ ክም ነብረ ናይ ኡዳም ወንዋይ እንዴ ገብእ እት መንፈዐት ልውዕል ህለ። እሊ ፋጆሊ እሊ እቱ ለልትረኩብ ‘ኤልዶፓ’ ዲብ ኦተረዶት ሽዑር ፈርሐት ወለዘት ሴድያይ ክምቱ እት ድራሳት ትወደሐ።

እትሊ ፋጆሊ እሊ እንዴ ረከዘ ለገብኦ ብዕድ ድራሳት መ 'ኤልዲፓ' ሕማም 'ፓርኪንሰን' እግል ለሓዬ ክም ቀድሮ ልትሸረከ ጸንሐ።

መመቅረሐት ናይላ ድራሳት እንዲ አትለው ‘ጠልፌሕ ጅንስ ፋጆለ’ ዲብ ኦርሆዮት ናይላ እትሊ ዘበን እሊ እብ ደረጀት እዲነ እት ለበቤ ገይስ ለህላ መሻክል ዐቅል፡ ሴድያይ ክምቱ ዲበ ለወደዉ ድራሳት ክም የቀነዉ ሐበረው። ህዮም እብ ሸክል ሐሊብ ውብዕድ ጅንስ ነብረ እንዲ ትሸቀ ዲብ ኦርሆዮት መሻክል ዐቅል ለትትሐመድ ነቲጀት ሰበት ትትረከብ ምኑ መንፈዐቱ እንዲ ኣመርነ እብ ምግባይ ቅያስ እግል ንልመዱ ወንትነፋሶ ምኑ ልትፋነው።



ክብሩዝ ድሁር ቅድስ ሰብር ኸብፍ ፍንስኸ ተሐባሪ



እት ብርጣንዩ እበ ለልትረከቦ
ምኤምረት ለገብአ ድራሳት፡
አግሩዝ ዲብ ርሕም እተ ለጸንሐ

እቱ ወክድ ወአስክ ክልኤ ሰነት
ዕምር በጽሑ፡ ብዝሑ ስከር ለቡ
ነበሪት ዶል በልዎ፡ ዲብ ምግባይ

ዕምር ክም በጽሐው ሕማም
ሰከር ወውቁል ደቅም ደም እግል
ልምጽጽም ለህለ በክት ለትወቀለ
ክምቱ ተሐበረ።

እሊ ድራሳት እሊ ዲብ 50 አልፍ ለገብአ በገበኩ ወክድ ለትወለደው እት ምግባይ ፅምር ለህለው አገፋረቱ ለገብአ። ለምኤምረት አግራዝ እት ርሕም እምም ምነ ለጸንሐ እቱ ወክድ፡ አስከ ክልኤ ሰነት ለአተሞ ምን ብዝሐ ጽብዋ ስከር ለቡ ነበሪት እንዴ አፊመው፡ ቅዛእ ለቡ ነበሪት ዶል በልዩ እት ምግባይ ፅምር ክም በጽሐው ሕማም ካልኣይ ጅንስ ስከሪ እግል ልጠወር እቶም ለህለ አብካት እብ 35 ምእታይት ለነቅስ ክምቱ ሐበረው። እምበል እሊ እብ ውቁል ደቅሞ ይም እግል ልትይምየ



ለህሊ በክት እብ 20 ምእታይት
ለትደህረ ክምቱ ሐበረው።

ምስል እሊ ዲብ ወክድ
ጥሩላቶም ድህር ቅያስ ሰከር ለቡ
ነበራት በልዎ ለዐለው እንፋር፡ ወለ
ክም ዐበው እበ ለልተቡቡ ንዛም

ሙኩት ሕማም ስከሪ ወደቅዋ ደም እግል ልምጽኦም ለቀድሮ ምንግቱ። ምን ዲብ ወክድ ጥፋላቸው ስከሮ ለቡ ነበረት ደጋግሞ ለዐለው ስነምህንድስና እሊ ሕማም እንዴት ተከረከ ክም መጽኦም እብ ምኤምረት ትወደሁ።

እትሊ ወክድ እሊ እግል
አግሩዝ እንዴ ትበሀለ ልትሸቄ ለሀለ
ነበሪት እብ ብዝሔ ጽቡዋ ስከር ለቡ
ሰበትቱ፤ ዋልዴን እንዴ አንብተበሀው
እግል ልዛበው ወጅብ፤ እምበል
እሊ ዋልዴን ውላደም አስክ ክልኤ
ሰነት በጽሕ ምን ስከር ለቡ ከፊፍ
ሱተይ ወነበሪት እግል ለአሪምዎም
መመቅረሐት ናይ እሊ ድራሳት
አትፋቀደው።

ሁቶም እንዴ አትለው እማት እት ለልዐምሰ እቱ ወክድ እብ ብዝሒ ጽበጥ ስከር ለቡ ነበራት እንዴ አንቀሰዩ፤ እብ ቀላል ገበይ እግል ልሕቀቅ ለቀድር ቅዛእ ለቡ ነበራት እግል ልብለዐ ዲብ ደንጎበ ትፋነው።

እግል ረድም ሳያታት ብጥረት ዓፍየት ለአነቅሰ

እግል ረይም ሳቦታት ብጥረት
እግል ዓፍየት ክም ኣዚ ባሕሲን
ጃምዐት ሲድኒ ኣውሰትራልያ ዲብ
ወደዉ ድራሳት ተሐበረ።

አስከ ቅሩብ ሰኖታት ምን ግሳይ ብጣር እግል ዓፍየት ሰኔ ክምቱ እብ ትሉሉይ ልትሸራሕ ጸንሐ። እትሊ ናይ አዘ ድራሳት ህዬ በጢር ክም ግሳይ እግል ዓፍየት ዲራይ ክምቱ ልትሸራሕ ህለ። ክመ ቀደም እለ ልትሸራሕ ለጸንሐ። እግል ረይም ሳቦታት ብጥረት ምስል ታምም ዓፍየት ልብ ክም ኢልትጸበጥ እተ ዲብ

83 አልፍ ሽዕብ ለገብአ ድራሳት እግል ልትአመር ቀድረ። ምናት እግል ረዩም ሳቦታት ብዋረት እብ አኪድ ክም እንዴ ትገሰኪ ውዕለት ክምቱ ወእግል ድሁር ደቅዋ ደም፡ መትሐባዋ ወመትዓቃድ (ሸይናት) አሰራር ደም፡ መሻክል ጸሌዕ አሰዑድ ወሕማም ንዛም ዱረት ደም ክም ለአመጽእ ለባሕሲን ለሐብር።

ሁቱም ምስል እሊ ዲብ አምዕል
ምን ክልኤ ሳዕት ወለዐል በጢር፡
ሕማም ንዛም ዱረት ደም ዲብ ክል
30 ደቂቅ እብ 11 ምእታይት ክም

ወቅሉ ወደሐው። ክል አምዕል ዝያድ 10 ሳታት መትገሳይ ህዩ ኡብካት እሊ ሕማም እት ክል ሰር ሳዐት እብ 26 ምእታይት ክም ወስኩ ወደሐው።

እትሊ ኦርእስ ትሉሉይ ድራሳት
እግል ልግበእ ክምቱ ለባሕሲን
እት ወድሒ፡ እብ ለትፈናተ
ኣሰባብ እግል ረዩም ሳያታት
እግል ትብጠር ዶል ትጀበር፡ እብ
ትሉሉይ ዕርፍ ንስኣት፡ እንዲ
ጸንሐከ ጸንሐከ ገሮብከ ሐረትት
ኬን ወእንሰር እግል ቲበል ክም
ለኣትሐኪ ኣትፋቀደው።

